

奢摩他室曲丛



耆摩他室曲叢

雜劇之屬  
誠齋樂府

曲江池

據宣德憲藩本校印

上海涵芬樓印行

# 新編李亞仙花酒曲江池 末旦全本

〔辨二淨上云〕命演角木蛟。化作鮎魚嘴。只是會幫閑。別無甚經紀。自家姓趙。綽名喚做趙牛筋。兄弟姓錢。綽名喚做錢馬力。無錢時淡淡相看。有錢時朝朝厮趕。別無甚買賣營生。只靠着幫閑鑽懶。如今是三月春天。子弟每都在郊外踏青玩賞。俺弟兄二人去郊外尋兩箇杓俵。哄他些錢鈔使去來。〔下〕〔末辨細酸上云〕春風和氣滿長安。赴選西行幾處山。咫尺天墀恭對策。名標金榜亦何難。小生姓鄭。字元和。鄭州滎陽人也。自從幼年。攻習儒業。黃卷青燈。寒窗十載。又兼家中豐富。父親是員外鄭澹。令小生上朝取應。與了小生百萬錢鈔。來到長安赴選。店中安下了數日。今日小生悶倦。上街閑行。怎生得箇伴酸的來。要啖一回也好呵。〔二淨急走上〕〔正淨問外淨云〕你認的兀那來的秀才麼。〔外淨云〕我不認得。〔正淨云〕這厮正是王家店裏安下的。滎陽來的鄭秀

才他將着好些財物。俺乍熟兒借他一借。〔二淨前云〕多時不見小官人。尊堂安否。〔末云〕小生從來不曾相識。二位尊兄如何認得。〔正淨云〕小人做買賣。常到滎陽。常見小官人。今日又相遇。小人吹彈歌舞都會。陪伴小官人郊外踏青。談笑一日。豈不美哉。〔末云〕我也正要尋箇知音的相伴。啗一同去來。〔末唱〕

〔子楔〕賞花時。喜得知音相伴留。正值春光堪玩遊。我和你初相見。說因由。情如故友。心意兩相投。〔二淨云〕小官人不遠千里而來。亦將有以利吾家乎。何故到此。〔末唱〕

〔么〕赴選皇都將我這學業酬。這的正是男兒得志秋。題金榜占鰲頭。萬言策須當應口。狀元名直教他喧滿鳳凰樓。〔下〕〔卜引正旦梅香上〕〔卜云〕老身是這長安城中鳴珂巷陌李媽媽的便是。有箇親生的女兒。名是亞仙。城中官長每見他生得好。與了他箇名字。叫做一枝花。近日留了箇員外姓劉。此

人十分有錢。雖與我女兒作伴。爭奈我女兒心中不肯允順。只待趕了他。〔做喚女兒云〕女兒你待趕了那劉員外。家中着誰養活。今日是三月春天。滿城人都去遊春。你正好引梅香出去。那踏青處。有可你意的。有錢子弟。每揀一箇來家津貼些過活。那時趕了劉員外。未是遲也。〔正旦云〕妳妳。你爲那兩貫錢呵。禁持煞我也。我的生性。不待見這村廝每。〔卜云〕你却待見那一等人。〔旦唱〕

〔子櫻〕端正好〔我則待立清名。伴一箇多才秀。有文章學業儒流。等得他青霄一舉成名後。匹配上鳳鸞儔。將煙月恁時收。撇罷了浪包婁。打疊起鬼胡由。那其間再不被您這閑雲雨相迤逗。〕〔旦云〕梅香俺便出城踏青去來。妳

妳。好生照管家園。亞仙踏青去也。〔下〕〔末引二淨騎馬上〕〔末云〕來到這郊外。遊春的人好是多也。〔正淨云〕俺二人在小官人馬前唱一箇小官人聽。〔正淨云〕你先唱。〔外淨唱〕出城東。出城東。柳陰濃。見一對游魚兒在水中。他

爲甚來來往往緊相從。也被春光引逗的。他兩情通。〔正淨云〕我也唱一箇。出城西。出城西。柳陰低。見一對黃鶯兒展翅飛。他爲甚金梭拋擲不相離。也被春光引逗起他那東西。〔末云〕您兩箇朋友是會耍笑也。再向前人稠處看一回。  
〔旦引梅香上云〕一行說話早來到郊外了。是好春景也呵。〔旦唱〕

〔點絳脣〕春日遲遲。困人天氣。韶光媚。草色芳菲。遍野均鋪翠。

〔混江龍〕佳人遊戲。鞦韆慵困解羅衣。梨園杏塢。竹徑桃蹊。收薄霧暖雲紅掩岫。漲清波新水綠平池。聲恰恰黃鶯喚友。語喃喃紫燕爭泥。亂紛紛偷香蝶舞。鬧穰穰課蜜蜂飛。士女每香車寶蓋。王孫每玉勒金羈。筵排着龍笙鳳管。酒斟着綠蟻香醅。花步障。綉屏圍。金錯落。錦摛披。柳絲絲風軟玉驄驕。水溶溶沙暖鴛鴦睡。一處一箇董源圖畫。一步一箇杜甫詩題。〔梅香云〕姐姐你聽波。甚麼蟲蟻兒。且是叫的好聽。〔旦唱〕

〔油葫蘆〕這的是野樹春紅哨畫眉。我這里閑行過小溪。我則見梨花影



裏睡鳧鷖。我將這骨刺刺小車兒碾得蒼苔碎。薄設設汗衫兒惹得遊絲細。  
〔梅香云〕地上青錢一般是甚的。〔旦唱〕撒青錢是榆莢飄。〔梅香云〕空中白綿一般是甚的。〔旦唱〕捲白綿是柳絮飛。〔梅香云〕兀那山前也有人家。〔旦唱〕只聽得汪汪犬向雲中吠。是幾家茅屋傍疎籬。〔梅香云〕這一帶人家也是賣酒的。〔旦唱〕

〔天下樂〕到處東風掛酒旗。寒食清明節令催。見拜掃的村姑每列酒食。看沙三舞一直笑王留唱一回。直喫的醉醺醺扶不起。〔末云〕您兩箇見麼。兀那花陰之下。好一箇美色佳人。〔淨云〕此乃鳴珂巷中上廳行首李亞仙也。其家資財巨富。此女貞烈。非百萬錢鈔不能少動其志。〔旦云〕兀那馬上好箇秀士。不知是何人也。〔梅香云〕俺近前去問候咱。是好箇秀才。〔旦唱〕

〔那吒令〕你傳情向那壁。啓櫻唇語遲。我潛身在這里。蹴金蓮款移。他凝眸了半日。呀。把春心逗起。〔末擲鞭科〕〔旦唱〕我見他輕將那寶鏡蹀。暗

把這絲鞭墜引的人意獍狂魄散魂飛。〔旦云〕秀才墜落絲鞭也。梅香。你去拾將來。〔梅香做意云〕姐姐。你待要他那一條一條。〔梅香用手比云〕偌長的一條要怎地。〔旦云〕是鞭子。你去拾來。〔旦唱〕

〔鵲踏枝〕梅香。你休要賣查梨。不誠實。你與我拾得絲鞭。便是良媒。則要你箇撮合山成就了鸞孤鳳隻。便是俺五百年該撥定的佳期。〔梅香做拾

鞭付旦科〕〔二淨云〕亞仙姐姐。拾將小官人絲鞭去了。觀其意。正是幽情已蕩漾。行步更飄蓬。嬌眼頻偷送。靈犀一點通。似有動色也。小官人亦當近前問候。少接談笑可乎。〔末下馬近前云〕久聞友人稱譽大姐。才貌雙美。今日於此相會。果是名不虛傳。〔旦云〕小官人。仙鄉何處。貴姓何稱。娶何姻眷。治甚營生。〔末云〕小生姓鄭。名元和。鄭州滎陽人也。年長二十二歲。幼習科舉。儒業頗通。特來長安赴選。未曾娶妻。〔旦與末同席坐科〕〔外辦劉員外扶醉上云〕我出郊外。尋了大姐一日。遇着朋友每相請。今日醉了。大姐和你說話的是甚麼人。

〔旦云〕你曠的爛醉了。又來尋厮爭覓歹鬪也。〔旦唱〕

〔醉鴈兒〕見那厮酒灌的昏沉醉。剗地待問他誰。你箇好歹鬪的驢頰道甚的。怎那做喬嘴臉權兒勢。〔做推外科〕〔旦唱〕靠那壁少禁持。我罵你箇潑東西。〔旦云〕看了你。〔旦唱〕

〔賞花時〕抵多少袖得春風馬上歸。空教我梅子酸心柳皺眉。〔外醉云〕

大姐你和別人說話。我不撚酸。你倒酸了心。皺了眉。〔旦唱〕聽說罷笑微微。誰和你嗑牙料嘴。將彩鳳配山雞。〔末云〕孤老海。噯噴撒了。俺辭了大姐回去也。〔末淨下〕〔旦云〕劉員外。你今番再休來纏我了。休等的錢鈔使盡。下翻了時。交椎瓦礫。悔之晚矣。〔旦唱〕

〔遊四門〕我怕你船到江心補漏遲。那其間悔去也喫敲賊。休想我落花有意隨流水。你索知風月擔早收拾。

〔勝葫蘆〕我常是翠被生寒有夢知。他則是曠得醉如泥。怎看他死勢村

沙腌所爲〔外云〕你罵我待趕我。你使了我千千萬萬貫錢鈔了。我怎肯落便宜與別人。〔旦唱〕看了他不識訕過。不知回避。剗地道他獨自落便宜。〔外云〕我醉了也。大姐有醒酒的湯水與些喫。〔旦云〕你去廁坑裏討湯水喫去。〔就推下外科〕〔外下〕〔旦唱〕

〔么〕這的是害酒從來沒藥醫。直睡到日沉西。你箇統鎊的哥哥再不要題。從今後收拾了煙月。尋着箇匹配。曉夜盼佳期。〔旦云〕恰纔見了鄭秀才。被那喫敲才攪了。不曾得說話。我看那秀才風流儒雅。我將托以終身之計。不知家中妳妳心內如何。〔旦唱〕

〔後庭花煞〕我見他俊龐兒堪品題。串幃的更整齊。賽子建文章盛。比潘安容貌美。〔梅香云〕姐姐不會和他陪伴些時。看他行藏。怎的便要嫁他。〔旦唱〕你不索更多疑。真堪托終身之計。效鸞鳳成就了一對兒好夫妻。

〔末上云〕小生西來應舉。到此月餘。專等金榜動。選場開。一躍龍門。以遂平生。

之志。昨日街上遇着兩箇朋友。同他踏青去。見了箇美色婦人。又拾將我絲鞭去了。以此放心不下。今日等兩箇朋友來。央他引小生去那大姐家走一遭。日早晚不見他二人來。（二淨上就唱）

〔靑哥兒〕昨日踏青踏靑歡笑。將箇杓俫杓俫伴着。花陰中見一箇女妖嬈。那小哥呆答孩的看了。軟兀刺了軀老。涎不答的眼腦。戰篤速了手脚。將絲鞭墜落。被佳人拾了。那小哥禁不得春事關心。將眼色招。俺今日去哄那廝幾百錠鴉靑鈔。〔做見末云〕小官人在此店中悶倦。何不散心去街市閑行。〔末云〕小生正要去尋兩箇兄弟。央你幹一件事。（二淨云）不敢。不敢。尊兄但有使令。小人卽當依命。〔末云〕昨日郊外見的那姑娘。十分大有顏色。小生故將絲鞭拋墜。那大姐就拾將去了。卽席之間。觀其深意。似有動色。敢煩二位弟兄。相引一至彼宅。少敘衷情。不勝幸甚。（二淨云）李氏之宅。在鳴珂巷中。其院舍深邃。非與之相識者。莫能一造其門。小人與李氏兄

弟交情至密。此事非用小人。莫能成也。但恨小人家下匆忙。未得閑暇。陪伴官人一行。勿罪。勿罪。〔末云〕未審有何事幹。但說何妨。小生亦當効力。〔正淨云〕小人家兄與人合些本錢。下路做買賣。明後日即行。奈家下寒微。欲去富家借些本錢盤費。有此相累耳。〔末云〕此事不難。小生多賣金帛在此。兄弟要多少。便且將去使。〔正淨云〕不敢。不敢。〔末云〕但說不妨。〔正淨云〕也無多。只少三五兩金。五十餘兩銀。〔末云〕小生儘有。便與兄弟。〔做喚六兒科〕〔與金銀科〕〔正淨謝科〕〔正淨背云〕錢。你也下一鈎子。〔外淨做意云〕趙哥陪伴小官人去。小人回家去。有箇郎中。前者醫好小人母親。今日小人街上賒兩疋緞兒。承謝他。不得閑去了。〔末云〕兄弟既來了。怎不一同走遭。兩疋緞兒有甚希罕。小生也有。便與兄弟將去。〔做取緞子與外淨科〕〔外淨謝科〕〔二淨引末走科下〕〔旦引梅香卜上云〕妾身李亞仙。自從昨日郊外見了那鄭秀才。生的外才內才。表裏相稱。又且無婚。我一心待嫁與他爲妻。他心中也動。故墜絲

鞭。今日已將劉員外趕出去了。梅香打掃了房子。安排下酒食。秀才必定來也。  
〔末引二淨上〕〔末唱〕

〔正宮端正好子母調〕芸窗下守青燈。蝸舍裏觀黃卷。志功名將鐵硯磨穿。今朝待把鰲頭騙。穩情取登科選。

〔滾綉毬〕只因是三月天。賞禁煙。見了箇意中人。把他留戀。片時間接了絲鞭。雖不曾口內言。將情意傳。則俺這兩心中暗包藏着。一天哀怨。恰相思早黑海似無邊。我這里恨無青鳥傳芳信。他那里待得鸞膠續斷絃。兩意懸懸。〔二淨云〕此處便是李亞仙之宅舍。待小人先去通報得知。〔正淨做見卜

旦科〕〔正淨云〕這秀才多有金銀。他入馬錢多要些。多把些與我。〔卜云〕我省得。不少了你的。〔正淨出問末云〕官人入馬錢多少。〔末云〕五十兩。〔正淨云〕少少得三百兩。〔末云〕錢財是偷來之物。不打緊。你將這一百兩銀。一對金釵。做入馬錢。〔正淨云〕俺的多少。〔末云〕每人十兩。〔正淨云〕先將來。這等

時方可成就。〔正淨云〕請請官人來拜妳妳。〔卜云〕多聞官人清譽。幸臨敝舍。風塵賤妾。敢望重勞台候。〔末云〕小生昨與大姐略會片時。便是身到蓬萊仙闕。今日特來問此親事。〔卜云〕官人若不棄嫌。賤女以配君子。幸莫大焉。〔末云〕似這般美色。果是人間少有。〔末唱〕

〔倘秀才〕我見他出香閨湘簾乍捲。他那里溜秋波星眸半轉。宮額塗黃貼翠鈿。整金釵鬆霧鬢。舒玉指理冰絃。天生的可憐。〔末向前云〕謹奉金釵一對。花銀百兩。以成定禮。〔淨遞銀與卜科〕〔旦插釵科〕〔末唱〕

〔滾綉毬〕從今後你將那新子弟休顧戀。舊相識不要纏。學些箇好人家體面。〔卜云〕官人你是儒流秀士。早晚登科。得一官半職。改換家門。須當應口。〔末唱〕我出言在駟馬之前。從今後鐵銚盤少去煎。銅磨筭再休轉。紙湯瓶不須紈扇。你將那水塌房皮解庫關閉的完全。〔卜云〕我都依你說。都關了閉了。只是你那五花官誥。駟馬香車。敢等的人頽氣了。〔末唱〕我則道你尋着駿



骨把黃金買。誰想你夢見槐花要綠襖兒穿。好教我半晌無言。〔二淨擡上

桌兒飲酒科〕梅香過盞與末末把盞科。〔卜云〕官人須要當得俺這家火。只

恐日久。一年半年費用多了。有些不備處。怎生是好。〔末云〕妳妳放心。〔末唱〕

〔倘秀才〕怕甚的當家火。一年半年費用過千錢萬錢。則你這銅斗兒家

私我自專。我則教孔方兄常富足。老薄嫵少煞煎。霎時間過遣。〔旦把盞科〕

〔末唱〕

〔白鶴子〕我見他瀉金波。親捧勸。停玉笋。鞦香肩。高唱着縷金詞。半掩着

圈金扇。〔旦彈箏科〕〔末唱〕

〔么〕支楞地冰絃上傳密意。高韻內寄情篇。聽數句鳳鸞吟。搗一曲春閨

怨。〔末云〕感謝妳妳厚意相待。小生有句話說知。此處非是小生久留之所。必須

另買房舍。揀擇良辰。備辦財禮。以娶歸室。誠所願也。〔卜云〕這事官人未可輕

易。想老身生的孩兒。不是一盆兒水洗的他長大了。官人走來。便要取去。却怎

地中。如今官人。且將行李都搬來。老身家中安放。做一回子弟。過一年半載。官人也見我孩兒心性。俺也要看官人一箇行藏。慢慢的商議。這事未遲。〔末云〕妳妳也說的是。你兩箇兄弟。去叫福住。將店裏行李。那幾箇打緊箱子。都搬將來。有兩箇文書箱子。兄弟家寄放一放。〔二淨下〕〔末云〕大姐。既是妳妳不肯着我取你去。如今你在這裏住。再不要喫你衣飯了。〔旦云〕你放心。我不似別人。〔末唱〕

〔紅綉鞋〕則我是新女婿初成繾綣。你將那舊姨夫再莫留連。玉粳牙休兜上野狐涎。我爲甚緊栽連理樹。則要你同長並頭蓮。休道是你緣薄咱分淺。〔二淨同六兒將切末上〕〔淨云〕官人。你行李都搬來了。遇着劉員外。他說有兩紙鹽引。一紙倉鈔。在大姐房裏。他要來討。恰纔和我鬧了一場。他來必有一場爭鬧。〔末唱〕

〔快活三〕恰纔明月圓。沒揣地起雲煙。自來好事不牢堅。又引的東君

怨〔末云〕好兄弟。等他來時。你勸一勸。教他去了罷。〔淨云〕小人知得。那厮無錢了。不怕他。〔末唱〕

〔柳青娘〕曾着重拳。他是箇煙月所中窮原憲。不識人意嫌。尙苦自緊相纏。在花街贍表有半年。你待將精銀響鈔買轉。買不成儘世團圓。抵多少舞裙邊。歌扇上。結姻緣。〔旦云〕那厮來時必定鬧一場也。閉上門不要開。〔卜云〕女兒都是你惹出事來。〔末云〕妳妳。大姐寬心。那村厮來。我有兩句話。教他喫箇無滋味。〔末唱〕

〔道和〕對嬋娟。對嬋娟。休索苦縈牽。恰開筵。教俺教俺自咕嚕。教俺教俺成嗟怨。村夫空使買嫌錢。暗埋冤。埋冤他不知些回轉。尙自騙。那些那些識體面。開談便覺村筋現。那些那些知空便。若還到此來相見。玳筵之前。數他一篇。問的他淹淹垂首。再再難言。〔外辦劉員外上云〕自家是劉員外。在李媽媽家纏着那科子。使的錢鈔都無了。只有兩紙鹽引和倉鈔。

不知那弟子要怎地。也不還我。今日來問他取。到這裏關的門緊緊地。我試叫他看。〔做叫科〕〔旦云〕不要開門。休采他。〔末云〕開了門放他進來。看他說箇甚的。〔淨做開門科〕〔外與衆相見科〕〔外云〕秀才。我初到他家時。也是如此。你不知道這猴兒弟子。每不中惹。聽我從頭數說一遍。〔外唱〕

〔耍孩兒〕向這花門柳戶均休戀。你便有賽陸賈的機謀怎展。你道有花星正照二十年。單注着郎君每赤手空拳。起初時能推房內頑石磨。間深裏賣了城南金谷園。聽咱勸。做虔婆的。把千斤斧劈開腦袋。做女娘的。將九股索套住喉咽。〔末云〕你自不成器。使的窮了。不關女娘每事。你聽我說。〔末唱〕  
〔八煞〕我和他身如此比目魚。情同錦水鴛。百年和美成姻眷。閑開東閣看歌舞。悶向西樓列管絃。貪歡宴。受用些金釵十二。紅粉三千。〔外云〕秀才你初到。是不知。〔外唱〕

〔七煞〕他那陷人坑埋伏的深。迷魂陣擺布的圓。他響玎璫放幾隻連珠箭。

他白奪鐵鷁三千引。贏得青蚨十萬錢。做子弟的則索把降旗展。輸的你  
有家難奔。有口難言。〔末云〕我不信這等利害。我則理會得。〔末唱〕

〔六煞〕同歸霧帳中。雙欵月枕眠。冰肌玉骨芙蓉面。準備着金冠霞帔。  
陞三品寶馬香車直萬千。怎比你身微賤。憑着我一生壯志。滿腹韋編。

〔外云〕那做子弟的。〔外唱〕

〔五煞〕那一箇不聰明不十全。不多財不有權。下場頭少不得成哀怨。送  
了些他鄉鹽客和茶客。都只爲每日花錢共酒錢。我也親曾見。送的人爻  
樵瓦礫。只因是品竹調絃。〔末云〕你說的差了。有幾箇古人也都是鳴珂巷女  
娘每。陪伴着秀才。那女娘每盡節守志。雖良家婦女們不如他。你聽我說幾句。

〔末唱〕

〔四煞〕有一箇王妙妙死哭秦少游。〔外云〕秦少游學士。貶死南荒。女娘王妙  
妙。與之有情。聽得訃音。一命遂終。是好箇烈女。〔末唱〕有一箇裴興奴重逢。

白樂天〔外云〕白樂天學士。當原有女娘裴興奴作伴。後來樂天遭貶去江州。到

潯陽江上。月夜聽得興奴琵琶之聲。重歡再會。不忘舊情。是也難得。〔末唱〕有

一箇燕子樓。許盼盼思張建。〔外云〕是有箇歌舞者。許盼盼。嫁與張建。封節制

張建封無了。盼盼不再嫁人。有詩云。樓上殘燈伴曉霜。獨眠人起合歡床。相思

一夜情多少。地角天涯不是長。這也是箇守志的。〔末唱〕他却曾芳心恨寄

青鸞鏡。抵多少淚血染成紅杜鵑。你道是娼優賤。怎生也夫妻情重。節義

心堅。〔外云〕雖然有的三兩人。正如沙內淘金。如今做女娘的。比古人不同。〔外

唱〕

〔三煞〕他則待錢財鈔貫親。怎肯將聰明文學憐。如今那虔婆每不道的

羊兒般善。有錢呵。管甚麼臭回回。臊羅羅同衾睡。無鈔也。你便是俊子弟。幌

郎君教他獨自眠。如今世態多更變。他把那張三舍前門恰送。李二哥後巷

忙撮。〔外云〕我也不和你評論了。我只問那老虔婆小弟子。藏了我鹽引倉鈔。怎

地不還。你若不將來。我必然告官去也。〔卜云〕你不害羞。來俺家怎地。〔卜喚淨云〕兩箇小哥。替我趕出去。〔外與卜鬧放倒卜科〕〔二淨與外拖扯下〕

〔末云〕正在歡會之間。被這潑廝攪鬧一場。〔末唱〕

〔二煞〕只因咱風流情興多。功名心較遠。強爭春引惹的蜂蝶怨。暫留月館風亭內。醉倚紅裙翠袖邊。看了這桃花面。因爲俺一時間恩愛。成就了五百載姻緣。

〔尾聲〕老薄癡心放寬。俊嬌娥情索專。你將箇志誠心。永遠的成姻眷。直教你駟馬香車將姓名顯。〔下〕

〔二淨上云〕俺二人幫着鄭秀才。不覺過了一年。如今他將本錢都使盡了。我家放的文書箱子。也討去賣了。俺如今再不要去借他去了。別尋箇有錢的孤答每。討些養活。〔下〕〔末檻縷辦上云〕寧可貧後富。不可富後貧。念元和富家之子。將這百萬錢財。長安應舉。因至鳴珂巷陌。將錢物使盡。科舉不中。羞歸

故里淹流在此。幸得亞仙守志。不肯棄舊憐新。但恨他那老虔婆狠毒。每日聒噪。要他別嫁人。亞仙一心願戀小生。不肯再覓衣飯。今日那虔婆又喚將大姐去了。不知說箇甚的。〔旦同卜上〕〔旦云〕秀才你雖是無錢了。我不棄嫌你。只是你不肯攻書。以圖後舉。你這齏鹽運限。幾時熬得出去。後年科舉。必能稱心。〔卜云〕舉。舉。舉他娘七代先靈。家中米也都沒有。柴也都沒有。養着箇窮秀才。不如養豬狗。你不趕了他。我不和你乾罷手。〔旦云〕妳妳。休雜嗽他。秀才。才是讀書人。知道今古。〔卜云〕今古。今古。是他娘屁骨。〔旦云〕秀才多聞廣記。〔卜云〕廣記。廣記。放他娘臭屁。〔旦云〕妳妳。這等樣板障。好是煩惱人也。  
〔旦唱〕

〔黃鍾醉花陰〕好教我怨綠愁紅自傷感。沒揣地情慳意慘。寬掩過越羅衫。雲鬢髣髴。陡恁的腰圍減。

〔喜遷鶯〕禁不得這羞慚。似這般無邊岸的閑愁獨自攬。將人虛賺。真毒



害忒貪婪。行監全不放半米愁。起萬頃風波。將子弟淪。忒大膽。端的是填  
不盡業海。塞不滿李藍。〔旦云〕妳妳。你這等炒鬧。要我另接人。我怎生肯。〔旦  
唱〕

〔出隊子〕你要我依前餘濫。潑風塵再不堪。解不開玉柙床。匝匝忒牢緘。  
撞不出花柳陣昏昏。實是慘。撇不下風月檐。沉沉怎地擔。

〔刮地風〕則被你歡喜冤家。迤逗煞。情理難諳。初相逢。只爲你多風  
鑑。急回頭。春色過三。楚陽臺。碧峯雲暗。桃源渡。綠波清湛。間阻多。遮閉岩。  
百忙裏。意中人不知着淪。情又忤。眼又饒。尙兀自把風流話。嘸。〔卜云〕秀才。  
你這等無錢財。在俺家也合尋些買賣。這城外有箇竹林神廟。好生靈感。你何  
不同亞仙去燒香。討箇卦。往甚處尋些營生。〔末云〕大姐俺同去。未知可否。

〔旦唱〕

〔四門子〕得團圓至死心無憾。捱盡鹽儘自甘。老尊堂省可里將人陷。

假虛脾。好話攙。你如今穿綉衣。戴玉簪。這家私似錦窠鋪苦的岩。向此時。索自參。送的他無錢爲俺。〔卜云〕秀才你同俺大姐。今日便去廟上。燒了香。討了卦。明日早些回來。〔末云〕妳妳在家。小生同大姐便行也。〔旦云〕城外竹林廟好遠路里。今日早些去來。〔末旦喚六兒牽馬科〕〔六兒將砌末上〕〔末旦騎竹馬云〕出的城。望南山不遠也。〔旦唱〕

〔水仙子〕竹林廟遠向南山。路窄滑滑擦擦步怎堪。將水面上扁舟。忽刺入收拾了絨纜。又則待短局促鞦韆。騾整了轡嚼。疎刺沙起霜風。刮散晴嵐。軟兀刺綉鞍兒身半探。我則見淅零零細雨連天。暗響潺潺野水落清潭。〔寨兒令〕魍魎。魍魎。直恁地所事多腌。眼盼着長途靜巉巉。自摧擲。自傷感。自寂寞。自清淡。

〔神仗兒〕誰想他連理樹可擦地便鈿。並頭蓮忽刺地便渰。將一對美滿夫妻。甜甜紺紺。送的來飄飄蕩蕩。拋家失業。被人胡吟。只落得破檻衫。

〔末云〕俺廟中燒香。就問一問吉凶如何。這板障時光。幾時熬得出來。〔旦唱〕  
〔尾聲〕你將這一世兒姻緣再重勘。聽不得他篤篤喃喃。才郎則你這透  
骨髓的恩情都只爲俺。〔末云〕兀的望見廟不遠了也。上緊走動些。〔末旦騎  
竹馬就下〕

〔卜上云〕老身因那鄭秀才無了錢鈔。不肯出去。纏的沒奈何。今在曲江池邊。  
另買了一所大宅子。昨日哄的那秀才大姐出城燒香去了。夜間老身推病。令  
小的每牽快馬去。取大姐先回來。用了這箇倒宅計。十分大妙。如今搬出去。趨  
了那秀才。便是平生愿足。〔下〕〔末旦上云〕昨日到廟中燒罷香了。五更時候。  
天色未明。漸好收拾回家去也。〔六兒急走上云〕大姐。大姐。家中妳妳得箇緊  
急證候。叫你騎快馬先回來見一見。〔旦云〕怎地好。我先去也。秀才你等天明  
了回來。〔旦六兒下〕〔末云〕天尙未明。且再回廟中歇一歇。獨自難走。天明了  
好行。〔下〕〔二淨檻縷辦上念云〕味已暖。心事不諧。老天一定有安排。今朝乞

食沿街走。只爲從前忒愛財。〔正淨云〕自家趙牛筋。兄弟錢馬力。俺二人爲幫閑。局騙了人錢物。被官司追要賠償。家財蕩然一空。今日向街上。只得唱些蓮花落。求乞些飲食充飢。〔外淨云〕聽得人說。今日有箇大官人家送殯。俺略坐一會。多等幾箇伴兒來。好去求乞去也。〔又辦一貼淨上念云〕買盡金波爲玉杯。醉鄉終日不聞雷。今朝乞食沿街走。只爲從前好酒來。〔貼淨云〕小人是箇好酒的王大。只爲這一口兒黃湯。不聽妻兒勸說。有一貫也喫了。兩貫也喫了。到如今一貫也無了。兩貫也無了。只得上街來叫化些兒。〔做與二淨見科〕

〔又辦一貼淨上念云〕一生氣槩不凡材。昂昂胸次捲江淮。今朝乞食沿街走。只爲從前好鬪來。〔貼淨云〕自家姓靳。因我受不得人的氣。好爭鬪。人都喚我做靳老虎。前者爲我爭閑氣。一拳打死了一箇人。官司拿住要償他命。我將家火兒都賣了。買了我一箇性命。因此十分窮窘。如今也在街上。叫化過日子。〔做見二淨科〕〔正淨問〕哥。你是誰。小人不認得。〔貼淨靳云〕我便是靳老虎。

〔正淨云〕你如今敢老鼠也近不得了。近甚老虎。〔貼淨斬云〕弟兄每休笑話。我也曾做好漢來。〔正淨云〕又不改。〔貼淨斬云〕還有鄭元和在後也來也。等他一同去。〔末檻縷辦上唱〕

〔商調集賢賓〕我當初占排場也曾奪第一。串了些花胡洞錦屏圍。我也曾兩雲鄉調揉釀旦。我也曾風月所暗約偷期。則爲我賞芳春夢撒了撩丁。因此上向花營納了降旗。想着那老虔婆狠毒心忒下的。小弟子又會虛脾。到如今寸腸千萬結。長嘆兩三回。

〔逍遙樂〕想當初別時容易。到如今見後艱難。只除是相逢夢裏。送的我戰欽欽忍冷擔飢。知他在何處銀箏間玉笛。抵多少步步相隨。俺只落得半頭斜炕。一箇歪瓢。兩片破蓆。〔末云〕自家是鄭元和。在李亞仙家中使錢。過了一年。被他老虔婆用了箇倒宅計。哄我出城去。投至我回來。鑽了房門。不知搬的那去了。尋不見他。小生手中又無一文錢鈔。衣服檻縷。一言難盡。想當

初不知怎生昏迷了。不聽人勸。今日落得如此。〔末唱〕

〔上京馬〕也是我一時間錯被那鬼昏迷。這是贍表子平生落得的。有鑑識的哥哥每知了。就裏似這等切切悲悲。從今後有金銀多價下些買糧食。〔末又云〕又遇這等寒冬臘月天道。肚裏又飢。身上又冷。紛紛揚揚。下着大雪。怎地是好。〔末唱〕

〔梧葉兒〕這雪賽柳絮漫天墜。似蝴蝶撲地飛。昏慘慘黑雲垂。玉琢就崇山嶺。粉填平深澗溪。富漢每吟微微。單注着俺窮子弟。年灾月值。〔末與四淨相見科〕〔末云〕衆弟兄每在此。正遇寒冬臘月。小生記得古人有兩句詩。道的好。詩云。長安有貧者。宜瑞不宜多。這等好大雪呵。單道俺這求乞的身軀也呵。〔末唱〕

〔醋葫蘆〕剪鷄毛雪正飛。覆羊角風又悲。好教俺說之難。思之苦。感之深。擔之久。冷清清難捱腹中飢。這些時頭不梳。臉不洗。牙不刷。口不漱。黃慊慊的改。

了面皮。空教人搥着胸。攬着脚。揉着腮。擩着耳。叫天吡地。也則是爲貪花。因好酒。愛錢財。爭閑氣。死林侵迤逗的俺怨他誰。〔正淨云〕俺又飢又冷。下着大雪。

怎生是好。〔末云〕俺幾箇都是爲酒色財氣。四般兒落得如此。您試聽我說一

遍。〔末唱〕

〔么〕酒呵。助豪吟詩百篇。放疎狂醉一席。這酒泛玻璃。斟琥珀。小槽邊。深巷裏。碧澄澄。香馥馥的潑春醅。你道是釣詩鈎。掃愁帚。旋添綿。增和氣。暖融融的紅了面皮。酌葡萄。銀瓮裏。飲羊羔。金帳下。咲談一會。下場頭只落得臥糟丘。喝醇水。這的是得便宜。番做了落便宜。

〔么〕色呵。歌玉樹。綵雲低。舞霓裳。翠袖垂。只因他。柳眉疎。星眼秀。點櫻唇。迎杏臉。美紺紺。嬌滴滴好東西。更有等。瞻花街。踏陣馬。錦纏頭。金買咲。喜孜孜的成了配匹。受用些。被兒中。枕兒上。臉兒偎。腿兒壓。兩雲歡會。下場頭只落得守孤燈。捱長夜。這的是得便宜。番做了落便宜。

〔么〕財呵。聚青蚨百萬堆。列珊瑚十數圍。端的是物之魁。人之膽。失之貧。得之富。最通神的箇好相識。你便待販南商。爲北客。慣經營。能積儻。把金銀直堆到北斗齊。你便賽石崇。過鄆塢。腰纏着十萬貫。敢誇那豪貴。下場頭只落得披羊皮。蓋藁薦。這的是得便宜。番做了落便宜。

〔么〕氣呵。逞籠豪猛力威。志冲霄氣蓋世。勢昂昂。雄糾糾。吐虹霓。搏天漢。仰觀着星斗恨雲低。你則待伴遊俠。同惡少。學會拳。打會棒。爭頭鼓腦的尋對敵。你待似孟施舍。不膚撓。不目逃。挫一毫。若鞭撻的浩然之氣。下場頭只落得叫爹爹。呼妳妳。這的是得便宜。番做了落便宜。〔正淨云〕俺去來。到街上唱

箇四季蓮花落。討些喫的。〔末四淨同唱〕到春來正月二月三月是艷陽天。

〔和〕見才子共佳人。綠楊中。紅杏外。載香車。乘寶馬。來來往往鬪駢闐。〔和〕

見幾對黃鶯兒。紫燕兒。遊蜂兒。粉蝶兒。嚼泥的。喚友的。偷香的。採蜜的。鬧喧喧。

〔和〕城裏人。城外人。爲士的。爲農的。爲工的。爲商的。都來慶賀太平年。〔和〕到



夏來四月五月六月是熱炎天〔和〕見才子共佳人涼亭中水閣上捲珠簾開翠幙悠悠韻韻的奏冰絃〔和〕見幾對錦鴛兒玉鷺兒遊魚兒蜻蜓兒同栖的共浴的躍波的點水的戲滿一池蓮〔和〕城裏人城外人為士的爲農的爲工的爲商的都來慶賀太平年〔和〕到秋來七月八月九月是漸涼天〔和〕見才子共佳人乞巧亭玩月館東籬邊南樓上歡歡喜喜的看嬋娟〔和〕見幾對鳴鳩兒促織兒蒼鷹兒白雁兒喚晴的泣露的決雲的傳信的咿咿啞啞落霞邊〔和〕城裏人城外人為士的爲農的爲工的爲商的都來慶賀太平年〔和〕到冬來十月十一臘月是凍雲天〔和〕見才子共佳人擁紅爐開暖閣玩梅花賞瑞雪齊齊整整到華筵〔和〕見幾對寒鴉兒凍雀兒鶻鵠兒黃鵠兒投宿的爭梅的搏風的相應的沖散了一林烟〔和〕城裏人城外人為士的爲農的爲工的爲商的都來慶賀太平年〔和〕〔末云〕恰纔街東討了一碗麵來俺五箇人誰先喫〔貼淨王云〕我先喫〔貼淨斬云〕我先喫〔外淨錢云〕我先喫〔正淨

趙云我且不喫兀的街西人家割着燒羊肉筵席哩。我先去討些燒羊肉喫。您分這一碗麵。〔末同貼外三淨云〕俺也且不喫這麵。也去討些燒羊肉喫。〔正淨云〕這麵寄放在那裏。〔末云〕無處寄。你在此看着。俺去喫了燒羊。帶些與你喫。〔正淨云〕也好。也好。您上緊去。〔末貼外淨虛下〕〔正淨云〕被我一箇識見。哄的他每一邊去了。這碗麵。我自在都喫了。〔正淨做慌忙喫麵科〕將麵喫了。有汁湯喫不了。破頭巾。破靴筒內傾了。將碗藏了。〔末領衆淨上云〕趙牛筋。這弟子孩兒。哄了俺。那得箇燒羊。你那碗麵那去了。〔正淨云〕我送去四隅頭酒店裏。熱着哩。買下酒。叫下唱的。來請哥每。上樓喫酒去。〔末云〕又是謊。這厮必定自家都喫了。〔外淨打正淨一下念云〕打你這乞兒。沒用。〔正淨打念云〕您何曾叫得一文。〔外淨打念云〕却怎將麵都偷喫。〔正淨打念云〕這是我獨善其身。〔外淨打念云〕却怎不留下半碗。〔正淨打念云〕一時間風捲殘雲。〔外淨打念云〕你爲甚酒淹衫袖。〔正淨打念云〕只因似大雨翻盆。〔外淨

打念云〕你莫不乞兒飽病。〔正淨打念云〕便七碗也習習風生。〔外淨打念云〕喫了的殘湯剩水。〔正淨取下頭巾就套在外淨頭上打念云〕都裝在我這頭巾。〔貼淨收念云〕氣財紅粉香醕酒。〔末云〕四件將人百事迷。〔末淨下〕

〔外辦孤老引六兒上〕〔孤云〕下官是鄭儋。滎陽人也。今有本州舉保來赴京都。入城來街市上。好人烟輳集也。想俺兒子元和來此赴選。將的錢財忒多了。想必被人圖財害了。〔六兒云〕街上有一火唱蓮花落的。內中有一箇恰似舍人。〔孤云〕二三年無音信了。那裏又有元和。你試去看一看。〔六兒做看末引〕

〔引末見孤科〕〔孤噴撒科〕〔孤云〕好也好也。原來你這等不成器。不肖子弟。玷辱我家。留你何用。六兒與我打死這廝。〔孤噴撒超祭科〕〔末做死科〕〔孤云〕打死了不曾。〔六兒云〕不曾死。只擡撒了。〔孤云〕既是死了。拖去曲江池杏園空地上丟了者。〔孤六兒下〕〔旦引梅香上〕〔旦云〕想起俺妳妳好歹也。曠着我。使了箇倒宅計。趨了那秀才。如今半年有餘。不知鄭秀才在於何處。妳

妳要我依舊喫衣飯。接客人。我怎生肯。又去迎新送舊。〔梅香云〕姐姐。道的差了。想姐姐自小來。也多曾接了幾箇客人。都不曾守志。偏怎生到這秀才跟前。便要守志。〔旦云〕梅香。你不知聽我說。我自小里不曾守志。蓋因俺生在花街柳陌。這門戶穿喫着這等衣飯。又不遇着箇趁心可意之人。出於無奈。要幹覓衣食。今既得共秀士成親。許了嫁他。我怎肯又爲迎送下賤之事。始以不正而立身。終當堅持而守志。知我者或可恕焉。〔梅香云〕姐姐。說話中間聽得房後有人呻吟哀痛之聲。不知何人。〔旦與梅香做看科〕〔做認得是元和科〕〔同梅香扶起科〕〔旦云〕你却爲甚。被人打的這般樣兒。〔末做起醒科〕〔末唱〕

〔後庭花〕老尊均發怒威。若嚴霜將草摧。險些兒一命臨泉世。閃的我孤身三不歸。不似你啜人賊。〔旦云〕秀才休錯怪我。不關我事。是俺妳妳做的勾當。我如今扶你家中將息去來。〔末唱〕你要我再遊恩地。我便似落花枝不戀葢。醃韭菜怎入畦。栽不成野薔薇。護不住出牆葵。再難收潑下的水。

〔青哥兒〕送的我似風前風前葉墜。好恩情看承看承容易。我欲待罵幾句棄舊憐新浪甚的。兜的上我心裏。想起舊日美滿夫妻。事事相依。步步相隨。素手相攜。丹臉相偎。共枕而棲。同桌而食。錦帳羅幃。綉幙香閨。巧畫蛾眉。揀口而喫。換套穿衣。你若還有些病疾。愁的俺似醉如癡。贖藥求醫。禱告神祇。更被你薄嫵禁持。撇了牙戲。相識輕易。姨夫妬嫉。若瞞兒有些胡爲。你盃地怒起。床兒前超祭。燈兒下跪膝。投至得歡歡喜喜。受多少切切悲悲。有時節應官身直盼到黃昏日。沉西。姐姐你想波。說來的都做了牙疼誓。〔旦云〕此事實不關我事。一言難盡。秀才你怎生被人打的這等。〔末云〕自從被你娘趕了我。一向在街上求乞。不想正遇我父親。將我打死。拖在杏園風雪之中。若不遇大姐相救。豈有元利之命。〔卜上做見末科〕〔卜云〕這潑弟子。你看他這等窮嘴臉。留在家做甚的。便趕出去。我不打你。〔旦云〕妳妳聽我說。咱想當初秀才將的錢鈔十分多。都因在我家使的窮了。到

今日將他折挫的至此。欺天負人。瞞心昧己。神明也不保佑。如今妳妳年紀六十歲了。亞仙家中積儻的錢財。情愿算計妳妳再過二十年的衣食之用。贖了亞仙之身。情愿與元和另住。尋些房屋。教他用心攻書學業。以待選場開。必稱所愿也。〔卜云〕你說的是甚話。你正青春年少的。去件這等一千年。一萬年。一百世。一萬世。不發跡的窮乞兒。我不肯。我不肯。〔末取刀云〕我左右是箇乞兒。活也活不成。死也不怕死。將這老虔婆殺了。拐將大姐去了罷。〔卜打慘云〕你休拿刀弄杖的。我肯了。我肯了。〔末放下刀問卜云〕幾時搬去另住。〔卜又云〕我不肯。我不肯。只是不肯。〔末又拿起刀要殺卜科〕〔卜又慘云〕肯了。肯了。今番肯肯兒地了。〔旦云〕休又後悔了。〔末唱〕

〔醋葫蘆〕乍相逢如夢裏。誰承望得重會。這的是有真情。誰怕隔年期。雖不似孟母三移將賢聖擬。則要我用心學藝。我將那三場的文字慎攻習。〔旦云〕秀才。你喫的穿的都不要你掛念。家私裏外。一應盤纏。我都管顧了。只

要你上緊攻書學業。等待科舉。以圖仕進也。〔末唱〕

〔浪來里煞〕深謝你俊嬌姿眷戀心。多感你可憎才忠厚德。你要我霎時間身到鳳凰池。則我對金鑿答策時才似水。折蟾宮一枝丹桂。那其間跳龍門奪得箇狀元回。

〔正淨酸孤幞頭綠袍辦上云〕下官是箇考試官。昨日諸生應舉。只有箇鄭秀才學得好。將他文字批了第一名。今日喚過那幾箇秀才來。再看他每學問如何。〔做喚末淨科〕〔末同外淨貼淨上云〕小生是鄭秀才。這箇是歪秀才。這箇是假秀才。考官呼喚。有何指教。〔正淨云〕你三箇秀才。今日何不吟詩一首。〔末云〕請考官出題。〔正淨擡起脚云〕秀才我出蹄了。〔打住〕〔末云〕不是這蹄。是詩的題目。〔正淨云〕我不知是甚木。松木。柏木。香楠木。榆木。柳木。杉。椴木。鼓樓邊有箇小目。西門裏有箇老目。他都是些色目。〔打住〕〔末云〕吟詩好歹要箇題目。考官出題目。小生好吟詩。〔正淨云〕我也不會出題。我有兩句詩。下

韻來不的。你續我詩的下韻。〔正淨念云〕聞道瑩堂白髮鮮。晨昏奉侍可心專。  
〔末念云〕一心早晚供甘旨。孝敬猶如孝祖先。〔正淨云〕秀才是好俊儒流。賞  
他一箇紗幞頭。〔正淨取下幞頭與末科〕〔末將幞頭出見二淨科〕〔二淨云〕  
小生二人文學較低。尊兄請教。〔末云〕適來考官有兩句詩。我續下韻。〔二淨  
云〕請道高才。高才。〔末續念云〕一心早晚供甘旨。孝敬猶如孝祖先。〔二淨  
云〕小生記了。〔正淨喚外淨云〕歪秀才過來。〔外淨上〕〔正淨云〕我有兩句  
詩。你續下韻。〔正淨念云〕紅粉佳人二八年。天生匹配好姻緣。〔外淨續念云〕  
一心早晚供甘旨。孝敬猶如孝祖先。〔正淨云〕打出去。你的箇老婆這等打緊。  
〔外淨下〕〔正淨云〕喚假秀才過來。〔貼淨上〕〔正淨云〕我有兩句詩。你續下  
韻。〔正淨念云〕烏嘴騎來未解羈。槽頭拴下可曾牽。〔貼淨續念云〕一心早晚  
供甘旨。孝敬猶如孝祖先。〔正淨云〕打打打。打出去。你那祖先變驢了。〔貼淨  
下〕〔正淨又喚鄭秀才科〕〔末上〕〔正淨云〕鄭秀才。你再續二句。〔正淨念



〔云〕駿馬輕鬃尾。金鞍纔鞴起。〔末續念云〕忙把玉鞭敲。一日行千里。〔正淨云〕秀才委實才高。賞他一領綠袍。〔正淨脫了綠袍與末科〕〔末出見二淨〕

〔二淨云〕好哥。再請教。請教。〔末念云〕忙把玉鞭敲。一日行千里。〔正淨喚二淨云〕你這兩箇歪假秀才也無用。只同續一首詩罷。聽我念。〔正淨念云〕寺在山門裏。一塔凌空起。〔二淨續念云〕忙把玉鞭敲。一日行千里。〔正淨云〕打打。鄭秀才的說。正馬便行千里。你的說一座塔。怎地塔也行千里。今番改了來。〔正淨又喚鄭秀才云〕你今番對一對句聽我道。〔念云〕青杏烏梅能解渴。〔末云〕黃精白合可充飢。〔正淨云〕好好。秀才聰明。嗶。賞他一對朝靴。〔正淨脫下靴與末了〕〔末見二淨〕〔二淨云〕恰纔考官罵不要小生依哥的。今番改了。只學一兩箇字兒。適來哥怎對來。〔末念云〕黃精白合可充飢。〔二淨云〕謝的哥。俺記了。不要上面四字。只記可充飢。可充飢三字。〔正淨喚二淨云〕你二人也對一聯。〔正淨念云〕千里浮雲能蔽日。〔二淨云〕一拋稀屎可

充飢。〔正淨云〕打打打。打出去。這廝口不乾淨了。〔二淨下〕〔末云〕多謝考官。老先生相待。小生就辭別了。明日以待瓊林之宴。〔末下〕〔正淨云〕好秀才。好秀才。我的衣裳都賞他了。靴也賞了。帽也賞了。唱箇曲的兒家去也。〔正淨唱〕

〔收江南〕俺在這棘園中考試。忒防過。你便考官清幹待如何。將俺這老酸落得笑呵呵。怎過活。這的是風流不在着衣多。〔下〕〔末孤辦引六兒上云〕小生一舉狀元及第。插金花。飲玉酒。瓊林宴罷。又蒙朝命。除授四川成都府參軍之職。今日謝恩了。回家收拾行李。走馬赴任去也。〔下〕〔旦引梅香上云〕自從元和秀才。應舉去了。半月有餘。不知文戰勝負如何。這兩日好是悶倦呵。則待睡些。〔旦唱〕

〔雙調新水令〕枕痕一線界殘粧。鎖雙蛾翠眉不放。青春人去久。碧海燕歸忙。獨倚牙床。怎消遣這情況。

〔駐馬聽〕篆冷餘香。幾陣東風落海棠。簷低綉幌。半竿斜日。又昏黃。淡

朦朧初月下西廂。吉玎璫鐵馬簾前響。助淒涼。燈花兒又把人虛誑。

〔喬牌兒〕 想起他忒聰明忒性良。知音律識彈唱。彬彬文質掙波浪。怎教人不念想。〔旦云〕俺困倚圍屏畧睡些。〔旦做睡科〕〔猛醒科〕〔旦唱〕

〔鴈兒落〕 瀉銅龍玉漏長。剪銀燭紗廚晃。淚痕溼翡翠衾。露氣冷鮫綃帳。

〔得勝令〕 枕兒上夢才郎。口兒裏喚梅香。却怎生鵲報喜來庭樹。蛛垂絲。遶畫梁。好着我徬徨。倚定了門兒望。又自索參詳。莫不這幾般兒都是謊。

〔末上云〕小生半月餘。不曾到家。今得官了。大姐必定喜也。〔梅香云〕姐姐。姐姐。秀才得官回來了。姐姐門前接官人去。〔旦唱〕

〔甜水令〕 慌的我淡掃蛾眉。輕鋪蟬鬢。心情悒快。下瑤堦出綉房。我見他帶掛金魚門排高纛。青春卿相。慶家庭喜氣洋洋。〔末云〕小生登科及第。爲官食祿。皆賴大姐救濟之恩。〔旦云〕官人。妾身豈想有今日也。〔旦唱〕

〔折桂令〕慶家庭喜氣洋洋。花插金瓶。爐爇名香。感謝洪恩。深蒙厚德。仰荷穹蒼。想當日花街內多曾浪蕩。到如今畫堂中別是風光。仔細裁量。似這般畫戟高衙。抵多少錦綉平康。〔旦云〕官人除授何職。何處爲官。〔末云〕小生一舉狀元及第。除在四川成都府參軍之職。〔旦云〕感謝洪恩。便將慶喜酒來。與官人慶喜了。赴任未遲。〔旦唱〕

〔對玉環〕花滿平堤。青驄嘶綠楊。塵碾紅輪。香車開綉幌。西蜀路途長。關山勞夢想。當日箇苦被尊堂。青樓折鳳凰。到如今喜共才郎。春閨同慶賞。

〔清江引〕春閨怎生同慶賞。樂奏聲嘹亮。初開玳瑁筵。滿捧葡萄釀。這姻緣不甚門厮當。〔旦云〕念妾身所出微賤。風塵儂妓。不可以與品官相配。今妾已盡所愿。答報官人之恩。終始如一。豈可以妾久玷辱夫人之位。今卽欲告別。然南行千里。途中無人奉侍。妾謹當送官人至劍門。官人前去到任。別擇鼎

族以繼良姻。妾卽當還家。以侍老母。守志終身。豈不孝義雙美也。〔末云〕小生未報大姐之恩。豈有再婚之禮。望同赴任。以全終始。〔下〕〔外辦老孤上云〕下官是鄭儋。滎陽人也。今蒙舉薦。除在成都府尹。今日闕下拜辭了也。明日便索長行。〔老孤念李白蜀道難一篇〕〔下〕〔末上云〕自離京師。行了月餘。來到成都參軍之幕府。沿路棧道險峻。跋涉艱辛。同大姐亞仙作伴。行至劍門。不肯前來。堅意要回。我留他在劍門等待。我打聽的俺父親也。除在此等見父親說知。看是如何。〔外辦老孤上云〕下官除來成都做府尹。今日聽的說。新除箇參軍相公到此。只得探望一遭。〔做與末相見〕〔相認科〕〔末云〕不想是父親到此。想當日曲江池邊棄置之時。尊親太嚴。豈知今日再得會面。〔老孤云〕當原一時之失。父子天性。豈可有絕。卽當父子如初。但不知小官人在長安之時。依倚誰氏。得遂登科。〔末云〕元和自愧深罪。謹當實告。當原因鳴珂巷一女子。李亞仙。在他家將錢鈔用盡。被他母逐出。後遇大人尊怒嚴責。棄之曲江杏園之中。

命幾不保。多得亞仙之力。扶策回家。稅居大宅。飲食所需。皆出於彼。再攻舉學。溫習藝業。二年之間。皆賴亞仙供奉。遂登甲科。〔老孤云〕此女可謂節義之入也。今在何處。〔末云〕彼自知微賤之軀。不敢見大人之面。送至劍門之地。便欲回也。〔老孤云〕不可。不可。有恩不報。非大丈夫。今速令馬取回。另別居住。重備六禮以迎之。永同諧老。不亦各進其道也。〔老孤喚六兒取旦回科〕〔末云〕便安排酒來。與父親慶喜。〔做飲酒科〕〔旦同六兒上〕〔旦云〕昔人有云。此去劍門。鳥啼花落。無非助人悲惋之興也。〔旦唱〕

**〔江兒水〕**

江即帶

花落鳥啼悲興長。悶坐雕鞍上。丹崖棧道高。碧澗流泉

響。馬兒上疔登登獨自想。〔六兒報云〕亞仙姐姐來到了。〔旦做與孤末見科〕

〔孤云〕小子不肖。昔留貴館。多得照顧。以成令名。擇今吉日良辰。謹備六禮。以成親迎。〔淨辦媒上一折了〕〔旦唱〕

**〔水仙子〕**一天和氣藹華堂。滿院清烟裊篆香。半簾晴日暉屏障。按笙

歌列兩行。綵霞飄玉珮。瑠瑤。青霄路同飛鸞鵲。碧梧枝雙鳴鳳凰。錦蓮池並宿鴛鴦。〔末云〕喚梅香將粧盒來。大姐打扮。〔旦唱〕

〔蟾宮曲〕

〔即折桂令〕

錦蓮池並宿鴛鴦。改樣冠梳。取次新粧。雲鬢堆鴉。修眉

掃黛。宮額塗黃。花露濕輕勻粉光。藕絲輕巧織仙裳。攜手蘭房。說幾句

心上恩情。證果了別後思量。〔外辨使命上云〕元和李氏聽我評論。亞仙妓女。

不失人倫。生居柳陌。長在花門。有仁有義。守分甘貧。容德兼備。出來超羣。父爲

府尹。夫作參軍。賜爾封號。濟國夫人。流芳百世。稱美千春。一家忠義。望闕謝恩。

〔旦唱〕

〔尾聲〕立芳名喧滿鳴珂巷。補風教知音共賞。成一雙美滿好夫妻。做

一段風流話兒講。

題目

鄭元和風雪打瓦礫

正名

李亞仙花酒曲江池

新編李亞仙花酒曲江池



奢摩他室曲鼓  
雜劇之屬  
誠齋樂府

# 繼母大賢

據宣德憲藩本校印

上海涵芬樓印行

# 新編清河縣繼母大賢全寶

〔二淨上云〕無錢淡淡相看。有鈔朝朝厮趕。別無買賣營生。專靠幫閑鑽懶。小子姓費名達。兄弟姓苗名敞。在這清河縣大街上居住。此間有一士人。姓王名義。他家中頗頗地有兩貫錢鈔。與小子每至相熟識。此人好去花門柳戶行走。又好喫酒賭錢。因此小子每常哄着那呆厮。上酒樓。看句欄。賭博戲。宿娼家。幫着他討些養活。喫用他些酒食錢物。今日上街尋他。又去酒樓上喫一醉酒去也。〔正淨上〕〔做相見云云了〕〔約去酒樓上去同下〕〔辦卜引末上云〕老身姓李。夫主姓王。有兩箇孩兒。大的這箇孩兒喚做王謙。是在前婆婆所生之子。第二箇孩兒喚做王義。是老身親生之子。在這清河縣居住爲民。當今太平之世。俺百姓人家守分安居。老身當着這窮家計。暢好費心也呵。〔卜唱〕

〔仙呂點絳脣〕教子讀書。治家爲務。居白屋。男事耕鋤。女勤力攻蠶布。

〔卜云〕老身不幸。親生之子十分不材。喫酒賭錢。全不聽老身教訓。幸有這大的孩兒孝順。〔末云〕妳妳。兄弟小哩。妳妳容恕他些。〔卜唱〕

〔混江龍〕這小兒迷了些潑天沽路。他則待貪花戀酒逞豪疎。做了些不養家的生理。使了些不疼熱的錢物。則待要穿柳陌洞房花燭夜。全忘了步蟾宮金榜掛名初。不肯學有材之士。常伴着無藉之徒。每日價續麻商謎。逐朝價賭博擲蒲。不離了歌臺舞榭。相隨着妓女娼夫。全不肯向螢窗十載學干祿。〔末云〕兄弟小哩。且擔帶他些。妳妳休惱怒。〔卜唱〕怎教我不愁填肺腑。氣噎胸脯。〔卜云〕這小兒不只是這不惜行止。去花門柳戶行走。他又好飲酒。發酒風。〔卜唱〕

〔油葫蘆〕他則待醉倒黃公舊酒壚。醉了呵便是他倒大福。他則待幕天席地眼模糊。常則教樽前有酒浮新綠。那里問書中有女顏如玉。但得在酒內眠。常教他花下居。則被這一、生花酒將他誤。因此上學業總荒蕪。〔二〕

淨扶正淨上〔正淨與二淨相別云云了〕〔二淨下〕〔正淨醉軀老見卜科了〕〔卜云〕這厮又曠的這般醉了。王謙將棍來。我打他。〔末跪勸科〕〔卜唱〕

〔天下樂〕端的是糞土之牆不可圻。你看他身軀狗不如。〔正淨放潑高叫科〕〔卜唱〕他那里逞疎豪放潑高叫呼。百般地心性狂。十分的膽量。〔末跪扯旦袖云〕妳妳且恕兄弟這一遭。〔卜云〕放手。〔卜唱〕不打下他呵倒着我眼睜睜成氣盡。〔正淨云〕哥哥放手。教娘打幾下。出了氣罷。〔末云〕兄弟今後却孝順。不要飲酒了。〔正淨做軀老云〕今後戒了酒。永不喫了。兄弟有箇戒酒的詩。念與哥哥和母親聽。〔正淨扯頭髮縛手念云〕初八斷酒。頭髮縛手。若要開酒。直到初九。〔打住〕〔正淨云〕娘。您兒願情出外做些買賣去。在家閑住。只是想些酒喫。娘與些本錢情愿去做買賣。〔卜唱〕

〔金盞兒〕你如今悔當初忒無徒。你道是從今改過尋些活路。你待要做經商買賣走江湖。〔卜云就唱〕你出外呵。便索改了你那性疎狂胸次傲。拳

頭大脰膊。〔正淨云〕今後却不敢撞事了。〔卜唱〕你休要有花逢店宿。無  
酒典琴沽。〔末云〕便是兄弟斷了酒。一心要出去做買賣去。妳妳與兄弟些本  
錢。教兄弟去走一遭。〔卜云〕你要那裏去做買賣。〔正淨云〕您兒要往莒城縣  
去做買賣。〔卜云〕與你三千吊本錢去。〔正淨云〕哥哥我如今孝順了。問娘討  
些口糧與我帶去路上喫。〔卜云〕與你一擔米去。〔正淨做俵兒勢地下打滾  
云〕少。少。少。我要兩擔米。〔末云〕你一箇人怎地用得了兩擔米。〔正淨云〕我  
將一擔米去。留下一擔米與俺娘。〔卜云〕孩兒孝順了。好好。留下一擔米我喫。  
〔正淨云〕哥哥我如今孝順了。問娘討幾件衣裳與我路上穿。〔卜云〕與你一  
套衣裳去。〔正淨又似前地下打滾云〕少。少。少。我要兩套衣裳。〔末云〕你一箇  
身子。要那兩套衣裳怎地。〔正淨云〕我穿一套衣裳去。留下一套衣裳與俺娘。  
〔卜云〕孩兒孝順了。好好。留下一套衣裳我穿。〔正淨云〕哥哥我如今孝順了。  
我將這偌多本錢去。却無一箇識貨的人。街上有那識寶貨的回回。願覓與我

路上做伴兒去。〔卜云〕與你三百貫鈔。願覓一箇回回一同去。〔正淨又似前地下打滾云〕少少少。我要兩箇回回。〔末云〕你帶一箇回回去路上作伴勾了。要那兩箇回回怎地。〔正淨云〕我帶一箇回回去。留下一箇回回與俺娘。〔打住〕〔卜云〕孩兒你這等風風世世的。休出外去罷。你聽說咱。〔卜唱〕

〔醉扶歸〕我願你青簡常留意。白屋永安居。朝暮勤攻些筆硯書。〔正淨云〕我願情做買賣。養活娘和哥哥。〔卜唱〕你欲待友愛親兒處。也不索經商路途。權且在家中住。〔正淨又似前地下滾云〕哉一心要去。〔卜唱〕

〔賺尾〕罷罷罷。你既要將資本作經商。心去也留難住。待去呵。囑付你千言萬語。沿路上合一箇知心好伴侶。〔正淨云〕我合的不是柳隆卿。便是胡子轉。

〔卜唱〕再休踏酒館花衢。〔正淨云〕我遇着高陽市。章臺街。也索走一遭兒。〔卜唱〕則要你早歸歟。莫得繁紆。常念着慈親暮倚閭。你既是衝州撞府。便索將經商爲務。却休被異鄉花草恣歡娛。〔下〕

〔二貼淨上云〕小子二人是費達苗敵。近日聽的王謙的兄弟王義。要往莒城縣做買賣去。俺也去幫着他走一遭。如今上街尋他。兀的王義來也。〔正淨上做相見云云了共下〕〔辦店主上云〕自家姓楊。名小二。是這莒城縣開店的箇店主。近日有清河縣來的三箇客人。在小人店內安下。將了些小本錢。每日上酒樓。喚唱的。如今使的本錢也無了。那王義雖是有些本錢。被那姓費的。姓苗的。每日哄着他擡樓兒喫了他的。又兼苦着一箇唱的妮子喜時秀。這兩日一發不來我店裏歇。丟下一箇箱子。也無甚東西了。我如今去尋他。來和他算一算帳。〔下〕〔花旦上云〕妾乃莒城縣上廳行首喜時秀。如今有箇清河縣客人王義。來俺家使錢。錢也無了。每日來喫酒。不肯出錢。今日等他來時。好歹多問他要些錢鈔。〔正淨二貼淨上與花旦相見了〕〔喫酒科〕〔舞唱了〕〔花旦云〕王義。你來俺家一月有餘。俺行院人家。專靠您客人喫衣飯。你怎地不將出錢來使。〔二貼云〕有。有。哥儘有。本錢都不曾動哩。〔正淨云〕大姐放心。我喫



了酒。去店裏連箱子都將來這里放。〔店小二上相見了〕〔正淨云〕小人恰待去尋小二哥取些貨。帶那箱子來。不想小二哥來了。正好。正好。〔店小二云〕我見你三箇客官。這兩日不來。每日使人來取錢物。我來和你算一算帳。〔正淨云〕小二哥。你且回去取些布來使。〔店小二云〕那里面有布了。你今日討五疋。明日討十疋。都使的無了。〔正淨云〕有八九十斤絲。取來使。〔店小二云〕那里面有絲了。你今日取五斤。明日取十斤。也都使的無了。〔正淨云〕我不信都無了。那一箇箱子好歹有。上緊取將來。〔店小二云〕箱子有。有。鎖的好好的。我便去與你送來。〔店小二就下〕〔二貼淨云〕哥再打十貫鈔酒來。大姐彈唱着。俺開懷喫些酒。錢財是偷來之物。休和他算。不打緊。〔又飲酒做醉帶酒科〕〔店小二將箱子上〕〔正淨云〕當面開了這箱子。取兩疋段兒與大姐。〔正淨身上取鑰匙開鎖科〕〔做開了箱將出兩塊大磚丟在地上〕〔正淨忙叫〕苦苦。被這店家偷了我的東西。却放上兩塊磚頭。〔做扯住店主相打科〕〔二貼淨拖

住店主〔正淨做打死店小二科〕〔二貼放倒連叫〕怎地好。怎地好。〔花旦閃下〕〔末上云〕小生是王謙。在家得了箇夢。放心不下。來這莒城尋兄弟王義。正見在這裏人家喧鬧。試看一看。呀。兀的不打煞人也。〔正淨見末云〕哥哥救我咱。一時間拳頭上無眼。打煞這店小二了。怎地好。〔二貼淨背云〕事到急了。不如此不中。〔二貼叫云〕王謙。你怎地走將來打煞了店主兒。你來打你兄弟。如何連平人也打煞了。我二人是證見。拖你官府出首去也。〔末云〕罷。罷。我爲我兄弟。便替他也甘心。你每不要慌。我寄信去取我母親來見一見。替兄弟當罪也不遲。〔二貼淨扯末下〕〔卜引小旦上云〕大的孩兒王謙。去莒城縣看王義去了。老身這兩日耳熱眼腫。好不放心也。〔卜唱〕

〔南呂一枝花〕拚不得百年老業身。做不下半世窮家計。措不乾一雙汪淚眼。解不開兩葉蹙愁眉。每日價切切悲悲。被兒女冤家累。閃的我孤身三不歸。這兩日面皮上豁豁的一似湯澆。耳輪邊氤氳的全如火炙。

〔梁州第七〕這兩日寢不安臥不穩夢魂顛倒。茶不茶飯不飯剛捱飢疲。

〔卜云〕王義那酒風子不打緊。〔卜唱〕連俺那孝順兒一去了無消息。愁緒保閑雲渺渺。悶懷隨明月依依。長吁逐秋風淅淅。傷心怕暮雨霏霏。則被這四般兒感動別離。又被那三莊兒忒煞禁持。好教人倚門問黃昏後。怨怨哀哀。投機杼白日裏愁愁戚戚。盼音書青燈下哭哭啼啼。這是我老來落得。常言道生男長女成何濟。似恁般不歸來遠鄉寄。抵多少義士還家盡錦衣。愁的人似醉如癡。〔外辦上云〕小人是王謙鄰舍家。王謙在莒城縣打煞人了。教我寄箇信去。報與他母親知。上緊來看一看。〔做與卜相見云云了〕〔卜做驚倒扶起唱〕

〔隔尾〕恨不得身生彩鳳雙飛翼。足躡青雲萬里西。誰想他招攬下無名殺人罪。耳聽了信息。說的我魂離了四體。我便索跋涉程途去問箇端的。

〔虛下〕〔貼淨扯末上云〕俺來這衙門前伺候了七八日。今日好歹放告也。

〔卜上云〕來到這衙門前。兀的俺孩兒在此。〔做扯住末正淨同哭科〕〔卜唱〕  
〔瑤華令〕我見他前推後擁衙門內。猛見了這幫閑漢。吸人賊。〔二貼淨  
云〕這婆子怎生知道。也走來了。〔卜唱〕不由我撲登登按不住心頭氣。  
則被這忤逆子。連累了孝順兒。都是這無徒輩。〔卜云〕你兩箇每日幫我孩兒  
喫了酒肉。又來害我。〔二貼云〕你兒子打煞人。干俺甚事。〔卜唱〕

〔感皇恩〕每日價陪酒陪食。哄他去柳陌花蹊。灌得你眼睛花。掙得你肚  
皮脹。您還道腹中飢。你這等幫閑鑽懶。到地又亂作胡爲。〔卜喚王謙〕孩兒  
你休替他認。〔卜唱〕你看他性風狂。則被那酒沈醜。多管是色昏迷。〔卜  
云〕哥哥每。休要屈賴了平人。這打煞人。本是王義來。〔卜唱〕

〔採茶歌〕殺人賊。是王義。小呆癡。潑無知。歹心機。不誠實。忒貪杯。每日  
價醉如泥。串花蹊。宿娼妓。使東西。本錢虧。不能歸。他實是不精細。不伶俐。  
惹下了這場官事。怎支持。兒耶。你替他招承。連累了你。〔卜云就唱〕王謙

兒呵。你休認。教他惡人自有惡人敵。〔辦公吏上云〕今日官人事忙。你這告人命的明日來。且回去。〔卜云〕王義孩兒。本是你打煞人。你從實認了罷。〔正淨云〕娘呵。我認了。本是我打煞人來。不關哥哥事。〔二貼淨云〕你認了不連累了俺。你不要認。〔正淨云〕我認了罷。本是我醉了打煞人。〔二貼淨云〕休認。連累了俺。〔末云〕老母在堂。小生是箇讀書人。怎肯着兄弟償命。終是俺娘的親生孩兒。我寧可認了。替兄弟償命。〔二貼云〕王謙哥老實認了好。認了好。〔卜唱〕

〔草池春〕好着我心似刺。委實地難自理。止不住哭哭啼啼。〔王謙扯住卜〕

叫。娘耶。娘耶。〔卜唱〕大兒將我扯只。哀哀叫天呼地。〔王義扯住卜〕娘耶。娘耶。〔卜唱〕小兒將我扯只。跌脚搥胸哭泣。因你戀色貪杯。致令死別生離。合着幫閑潑皮。每日相逐相隨。送了潑天活計。惹下這場罪戾。大兒德行誠實。孝友誰人不知。雖是前妻養的。強如親生苗裔。小兒酒

色着迷。不聽我的教誨。惡了街坊鄰里。背了親眷相識。我今老弱殘疾。到被小兒帶累。不由我數一回罵一回。怎教我不淚似扒推。怨怨淒淒。切切悲悲。這的是人善人欺。不辨高低。我明日向官中訴一遍心頭氣。子細地說就裏。論是非。我直教官府中評跋箇好弱。別辯箇虛實。〔二貼淨云〕妳妳你大兒王謙認了。留你親兒却不好。〔卜唱〕

〔尾聲〕都爲你這兩箇陷人賊。放潑無人義。更合着忤逆子癡心少鑒識。送的俺一家兒忒狼狽。到明日老婆子廳前跪膝。說你兩箇小猴子的。就裏。不到的輕輕索放了你。〔下〕

〔辦孤上排衙科〕〔做外郎發科云云了〕〔孤云〕昨日有一起告人命。喚他來整理。〔傳喚一行人上〕〔卜唱〕

〔雙調新水令〕不爭這潑無徒插狀告官來。單注着俺孝順兒這場不快。好着我悲啼的昏了老眼。怨恨的塞滿胸懷。也是他月值年災。命拙時乖。

不隄防這一害。〔做見孤科〕〔孤問科〕〔二貼淨云〕這王謙是王義的哥哥。王義同小的每來莒城做買賣。王謙自清河縣來尋他兄弟。喫酒中間。打他兄弟。店小二去勸。將店小二打死。〔孤問王謙〕〔末云〕是王謙不悞間。將店主打死來。〔卜唱〕

〔喬牌兒〕告大人聽妾身前訴解。這兩人忒圖賴。這王謙謹厚言無外。怎肯做殺人賊強暴客。〔卜云〕本不是王謙打死人。〔孤云〕却是誰來。〔卜唱〕是王義來。〔孤云〕你是箇婦女人。怎知是王義。〔卜唱〕

〔慶東原〕這小兒向莒城爲經紀。一去了箇月餘不到來。〔卜指二貼淨〕〔卜唱〕被這兩箇幫閑鑽懶的胡捏怪。〔孤云〕這兩箇怎地來。〔卜唱〕貪着那瓮子裏酒釀。〔孤云〕再怎地來。〔卜唱〕使盡這箱子裏匹帛。〔孤云〕再怎地來。〔卜唱〕戀着箇瓦子裏裙釵。〔孤云〕戀着那裙釵。却怎地來。〔卜唱〕窮急也被人嫌。〔孤云〕却怎地打死人來。〔卜唱〕酒醉也將人壞。〔孤云〕不是王謙。

如今這王謙却怎地自肯招認了。(卜云)大人這王謙從來孝順。又疼他兄弟。因此上替他兄弟認了。(孤喚王義云)王義是你打煞人來。(正淨云)是王義打煞人來。(孤云)這兩箇都認了。且不着兩箇償命。祇候人與我打。教他老實說。(祇候打科)(先打王謙)(且哭向前救唱)

〔殿前歡〕他那里打將來。疼的我心如刀刺眼難擡。告恩官略且須擔帶。苦痛哀哉。(又做打科)(卜伏前救唱)打的他皮青肉綻開。告大人權寧奈。我這里忙把衣服蓋。(卜躺倒在末身上)(孤云)你怎地。(卜唱)等老身替他受杖。也是合該。(孤云)却打那王義。(做打科)(卜云)王義孩兒。是你打煞了店小二。你認了罷。(正淨云)是我打煞了來。(二貼云)大人。王義害怕虛招哩。(孤云)再打。(做又打科)(卜云)孩兒招承了罷。你聽我說。(卜唱)

〔殿前喜〕想着你終朝醉眼何曾開。常眠花市側。(正淨云)你兒酒也喫來。花也戴來。都認了。(卜唱)你看他當官不怕尙寬懷。你休做謊話猜。不



比你償花債。〔正淨云〕我認了償命也。娘是必多澆幾盞兒酒。做箇鬼也快活。

〔卜唱〕你待要糟丘深壘葬尸骸。做一箇鬼魂兒也樂哉。〔孤云〕這婆

兒。這王義。莫是你過房之子。或是前家後繼。這王謙敢是你親生的孩兒。〔卜

云〕告的相公知道。這大的孩兒王謙。是我夫主先娶的婆兒上生的。這小的

孩兒王義。是老媳婦親生之子。〔孤云〕打你這先的婆兒生的王謙。你到這等

疼痛他。打你這親兒到不疼。是怎地說。〔卜云〕告的相公知。這親生兒王義。好

喫酒賭錢。不幹家業。老媳婦教訓他不肯改。又兼本是他打死人。他犯了正罪。

所以到官司不敢救他。怎地不疼他。想着十月懷胎。三年乳哺。回乾就濕。擡舉

成人。不是一盆兒水洗大了。〔正淨扯卜哭云〕娘也救我一救。〔卜哭云〕兒耶。

你犯了法度。殺人償命。我怎救的你。〔祇候扯開〕〔孤云〕你這前家兒王謙。却

怎生十分疼他。〔卜云〕王謙的父親在日。曾分付老媳婦。好好地看覷這孩兒。

老媳婦想這世間。的後姚婆出來的打罵前家兒女。不肯愛惜前家兒女。但有

好喫的好穿的。只與親生兒女受用。將前家兒女作賤打罵。老媳婦深恨這等後姚婆。所以老媳婦看的前家兒女十分疼熱。又兼王謙十分孝順。本不是他打煞人。因此老媳婦救他。不着屈了孩兒。〔孤云〕這是大賢之人。請請請。上廳來動問咱。〔卜起近上〕〔孤云〕你是何處之人。在家作甚生理。你兒子每學甚文藝。〔卜唱〕

〔水仙子〕清河縣裏有莊宅。白屋輕當民戶差。幸遇着太平時世恩波大。樂豐年百事諧。請了箇村學究教子成材。欲待要應舉登雲路。脫離了爲農困草萊。誰想道撞入這翠柏烏臺。〔孤云〕你家既是讀書學禮之家。怎生着兒子打死人。〔卜云〕大人試聽老媳婦說咱。〔卜唱〕

〔沽美酒〕雖是這王謙的命運衰。雖是這王義的性狂乖。〔卜指二貼淨〕

〔卜唱〕都則爲這兩箇現世生苗狗溺胎。諸般的孽劃。開着他忒分外。

〔卜云〕大人都是這兩箇幫閑的來。〔二貼云〕你兒子打死人。干俺甚事。〔卜

唱

〔太平令〕每日家不離了花衢紫陌。常惹在酒館長街。他比那胡子轉心腸狠。他比那柳隆卿行藏尤。每日家走來。將俺酒釀肉嚼。喫的那快哉。〔卜云〕臨了呵。告了俺兒一狀。〔卜唱〕大人。這的是還了俺酒錢花債。

〔孤云〕這兩箇又來虛賴王謙。又幫閑害人。拿去監下。將王義也監下。等待文書償店小二的命。這王義的母。十分大賢。如今申稟上司去也。〔卜拜唱〕

〔尾聲〕謝恩官判斷的無偏側。〔正淨叫云〕娘救我一救。〔卜走上前扯住着脚。淚如傾。抱着頭手難解。〕〔下〕

〔二貼淨上〕〔費云〕如今官人倒依那婆子說。申上文書去。將俺做賴人的。得了箇妄告不實的罪。當初都是你先起心賴他。〔苗云〕我不曾。是你先起心來。〔二貼爭開打一折下〕〔辦使命上云〕如今因爲清河縣繼母大賢。官裏差我

前去。賜他金冠霞帔。封做賢德夫人。大兒王謙。封做殿前太尉。小兒王義。打煞人命之事。免他償命。便去封官去也。〔下〕〔辨朗孤衆孤上云〕前者有清河縣繼母大賢。官裏差人封官去了。怎地這數十日還不見來。〔卜冠服〕〔末披乘〕

〔正淨貼淨一行人上〕〔卜唱〕

〔大石調六國朝〕金門春曉。玉陛花朝。開寶殿瑞雲浮。望瑤臺香霧繞。舉目瞻龍樓。鳳舞青霄。鵠立鵷班早。天堦明月皎。珠簾外煙消寶篆。名園內露滴花梢。風透碧窗寒。漏傳銀箭悄。

〔歸塞北〕莫不是仙宮閣。却怎生旌節錦飄飄。我這里觀御苑都是晴霞罩。看金溝流出落花飄。猛聽的天樂振琅璈。〔卜云〕這是朝門內也。想俺莊

戶人家。幾曾見這般宮殿來。〔卜唱〕

〔卜金錢〕想俺在草舍柴門。幾曾見恩光榮耀。把不住自驚荒小鹿兒心頭跳。見了萬國朝。齊呼噪。頭直上暮聽得宣丹詔。〔朗孤云〕召過那清河縣

的一行人來〔外應了〕〔卜唱〕

〔常相會卽怨別離〕錦衣花帽總英豪。近前來險說倒。則見那武士金瓜忙圍繞。人靜悄。兀良隱隱鳴鞘聲漸杳。〔卜向前一行人跪下〕〔卜唱〕

〔鴈過南樓〕俺這里荒篤速渾家老小。戰欽欽手足頻搖。一箇愁蹙着眉。一箇彎跄着脚。嘆衰年老拙來到。〔朗孤問云〕你兩箇孩兒。那一箇孝順。〔卜唱〕這小的兒一剗狂。這大的子十分孝。〔朗孤云〕你怎地不教導。這小的。〔卜唱〕老賤妾都一般教導。〔朗孤云〕那箇是你前家兒。那箇是你親生子。〔卜唱〕

〔催花樂〕殿前一一說根苗。這王謙亡過親娘。妾身曾教。數載攻書學業高。一世爲人情性好。〔孤云〕你那親兒。怎生到不孝順。〔卜唱〕

〔淨瓶兒〕這王義效金谷花間樂。愛畢卓瓮頭糟。氣沖牛斗。心尙奢豪。難教更燥暴。瞻表粧孤一剗瓢。他是箇腌材料。向高陽常盼常盼酒旗

招。〔朗孤云〕聽我發落您。〔孤念〕聖人教人以禮。夫婦人倫之始。李氏後娶之妻。賢德人間少比。能撫前家之兒。愛養如同己子。朝暮教訓讀書。感應達於天地。親子致傷人命。不肯瞋心昧己。母封賢德夫人。長子殿前太尉。次子赦免寧家。再來不得無理。兩箇幫閑歹人。割了他的饞嘴。再有離間親親。都似他的樣子。這的是清河縣繼母大賢。看那普天下姚婆每學你。〔卜一行人拜謝了〕〔卜

唱〕

〔玉翼蟬煞尾〕誠惶頓首。深感擔饒。遠拜丹墀。遙瞻天表。山呼踊躍。揚塵舞蹈。綠衣紗帽。一家歡樂。均恩怎報。恤孤念老。寬刑有道。訪及岩壑。我尙則心怯怯。意喬喬。言語澁。魄魂銷。神恍惚。體虛飄。看了這十二簾櫳。百萬貔貅。九重樓閣。秉着這象簡朝服。遙望着玉宸楓宸。恰拜謝了。

幫虎的興詞告狀

題目

調樣的喫酒賭錢

正名

莒城店親兄友愛

清河縣繼母大賢

新編清河縣繼母大賢





耆摩他室曲鼓

雜劇之屬  
誠齋樂府

團圓夢

據宣德憲藩本校印

上海涵芬樓印行

# 新編趙貞姬身後團圓夢全賓

〔外同卜上云〕老夫姓錢。名繼昭。當着這山東濟寧衛軍伍中老幼身役。有我老妻鍾氏。當原曾與本衛軍人。趙友諒之妻李氏指腹成親。後來我家生了一男。名做鑽兒。他家生了一女。名做官保。今長一十八歲。因我家貧窘。十分艱難。不曾敢去他家題這親事。昨日趙友諒使那做媒的王婆兒來我家。問老夫前約。老夫因家下寒微。不能措辦財禮。央那王婆婆好生到親家告說。若是將就。老夫家寒。不計財錢呵。老夫便令媒人去說。喜得王婆婆滿口兒應承去了。只是家中無錢與他。喫了一盞清茶去了。老妻今日却安排下些酒食。恐怕王婆兒又來也。〔下〕〔李辦趙貼淨辦李上〕〔李云〕老夫姓趙。名友諒。現住在濟寧狀元坊。當這本衛軍伍。上下官府。見老夫有幾貫錢鈔。又志誠忠厚。也不曾有重差使。派與老夫身上。老夫同妻李氏。早晚在家。過這太平之時。軍民皆享快

樂。只是老夫心上有一件事放心不下。婆婆你可知道。〔貼淨云〕俺家不少喫。不少穿。有甚放不下心。敢又思量把我女兒官保嫁那窮厮。我一世不肯。便休開口。〔李云〕婆婆。你差了。當原指腹成親。許了錢家的兒子。今日怎可翻悔。〔貼淨云〕你便要將女兒嫁他。我女兒見他家貧窮。怕那受苦。必也不肯。〔李云〕試喚女兒出來問他看。〔貼淨喚科〕〔正旦家常扮上做相見科〕〔李問科〕〔旦唱〕

〔子模〕賞花時。拜答尊均問此婚。他終是自小萱堂指腹親。〔貼淨云〕他家如

今窮了。又不曾接他花紅酒禮。怕怎地。〔旦唱〕妳妳待悔前約。妾難違。〔貼

淨云〕我與你別尋一箇門厮當戶厮敵的好女婿。〔旦唱〕你待要別尋箇對

門。我則怕鄰里笑親家噴。〔媒上相見了云〕趙大公昨日暗暗地使婆子去問

那錢家親事。他千也說艱難。萬也說艱難。又是無財錢。又是無酒禮。一箇小厮

十分不成。喫酒賭錢。不顧家業。要他怎地。你女兒嫁了他。一日也過不得。〔貼

淨云。却如何。却如何。別嫁了罷。〔旦唱〕

〔么〕想是他貧窘無錢。可待賓。因此上引惹的媒婆心內狠。你欲待滅禮義亂人倫。〔媒云〕我恰纔來路上撞見月舍。他纔十九歲。他要問箇親事。此人十分有錢。又生的可喜。大公做箇主張。着他定了罷。〔旦唱〕便有箇可喜舍人。我怎肯愛富却嫌貧。〔旦下〕〔李云〕我女兒的言語。正合我心。久後必索嫁與錢家爲婦。不可失信也。〔皆下〕

〔正淨辨月舍上云〕小子姓字奇拗。喚做月舍名號。將着無限金銀。只要尋箇底老。四五年。前那趙家有箇好女兒。曾許了錢繼昭的兒子。鑽兒爲婚。如今錢老又死了。錢家十分窮困。飯也無的喫。軍身又累的荒。他那里有那錢來娶渾家。小子如今。央及那說媒的王婆兒。再去說一說。若成了這親事。當重重的相謝他。便是小子平生愿足。〔下〕〔李同貼淨上云〕自從錢老兄歸世。不覺又過三四年了。有我女兒官保。舊日一門親事。如今女兒年紀也大了。二十三歲也。

國圖  
一

婆婆。可選箇良時吉日。嫁與他家罷。〔貼淨云〕他將甚物來娶。且不精精地送我女兒與他兒子做老婆去。〔李云〕我家頗有些錢鈔。倒陪沿房首飾。嫁與他也是老夫一件陰鷲之事。〔貼淨云〕隨你隨你。既要與他。也不揀日子。只今與了他去罷。常言道兒大不中留。留着結冤讐。〔辦媒上云〕月舍一篇了。〔李云〕這事如何使得。只宜央你媒人還去錢家說了。教他來娶我女兒。沿房首飾。花紅酒禮。都是我家出辦。不必親家費心。〔媒李皆下〕〔卜辦鍾婆兒上云〕自從夫主錢繼昭去世之後。不覺又是五年了。有孩兒鎖兒。親事一節。昨日媒婆來說了。今日媳婦兒過門來成親也。多感親家。倒陪沿房相送。安排些酒。敢待來也。〔末旦媒上唱迎仙客一折了〕〔飲酒了皆下〕〔外辦樺老上云〕如今起取操練軍士。有濟寧衛欠軍若干。但是少壯的都去。官人差我來喚錢鎖兒。去口北操練去。〔做喚科〕〔末上〕〔旦上〕〔喚催行科〕〔旦付首飾盤纏〕〔旦云〕丈夫你去從軍。妾須送你至十里長亭。〔皆下〕〔正淨辦月舍上云〕如今錢家的

兒子錢鎖兒去口北操練去了。小子從來看上他那渾家趙官保。小子務要娶了他爲妻。今日還去尋那媒婆王婆婆兒去也。〔盧下〕〔媒上云云了〕〔淨上相見說前事了皆下〕〔正旦上云〕日月好是過的疾也。自從夫主從軍去了。不覺又是數月光景。每日奉侍婆婆甘旨。以盡孝道。爭奈家貧。紡績爲生。以供飲饌。〔媒上相見了〕〔媒云〕小大姐。你不悶倦。我引你去門前閑耍一回去來。〔旦云〕我丈夫不在家。豈可私出閨門。王婆婆。你不知爲婦女的清名。易於點流。你試聽我說咱。〔旦唱〕

〔仙呂點絳脣〕經史儒書。古今賢婦。從頭數。也有那好弱賢愚。萬載馳名譽。〔媒云〕我只會說媒。那裏管那名譽。〔旦唱〕

〔混江龍〕做女子時在家從父。爲人妻呵。既筭出嫁索從夫。秉貞堅節操。立穩重規模。〔媒云〕大姐。你在這白屋中閑居着。不老了人也。〔旦唱〕你道我白屋閑居人漸老。我則待青燈相伴影常孤。〔旦云〕王婆婆。我待學幾箇古

人清白守志。〔媒云〕大姐待學那幾箇古人。試說一遍老身聽咱。〔旦唱〕我待學呂氏榮能殺盜以甘其忿。孟德耀高舉案以事其夫。魏溥妻親割耳以成其志。梁高行自剗鼻以撫其孤。王凝婦輕斷臂明其貞烈。孟姜女長哀慟傾彼城隅。魏貞姬刀斬指不從賊令。竇烈女投崖死旌表門閭。我怎肯流芳名同街市。濫風聲。則待要守清白學上古賢人趣。雖不把儒學講誦。也曾將女誠熟讀。〔媒云〕這幾箇古人都是不肯重婚再嫁的。干死了那呆類。我只說爲人一世快活了便宜。那名兒有甚緊要。〔旦云〕你只知道眼前的光景。怎知那身後的好名兒留傳萬古。〔媒云〕還有甚麼好古人留下甚麼好名兒。〔旦唱〕

〔油葫蘆〕有一箇抱姪挾男魯義姑。他將這親子疎。〔媒云〕魯義姑是也是箇好人。〔旦唱〕更有箇採桑的烈女遇秋胡。〔媒云〕這秋胡戲妻。他那老婆也忒狠毒些。〔旦唱〕更有箇二移居止的賢人母。〔媒云〕這是孟母三移也是箇好人。〔旦唱〕更有箇兩朝師範的班家婦。〔媒云〕這是那做女



誠的曹大家。也是箇好人。〔旦唱〕更有箇忠馮姬能當熊。〔媒云〕漢時馮婕妤當熊。也是箇好人。〔旦唱〕更有箇孝楊香敢跨虎。〔媒云〕楊香女爲他父親跨虎救父。也是箇好人。〔旦唱〕更有箇浣紗抱石投江女。〔媒云〕這是爲伍子胥。浣紗女抱石投江。也是箇好人。〔旦唱〕他都向青簡內把姓名書。〔媒云〕我且不和你說那古人。且說你的夫主。一去了杳無音信。你這般小小地年紀。撇在這里。你又生的好。花也不如你的顏色。幾時是箇守的了時。〔旦唱〕〔天下樂〕抵多少夫成蕭關妾在吳。你道我身軀花不如。聖人道冶容的。誨淫何足取。〔旦云〕我如今侍奉着婆婆呵。〔旦唱〕但學得趙貞女般有孝心。怕甚麼宿瘤女般無美譽。我則待播清風一萬古。〔媒云〕大姐我有一句話。敢勸你麼。〔旦云〕王婆婆你試說咱。〔媒云〕你如今這般窮呵。何不尋箇着衣食飯處。揀箇官員舍人。這城中少甚富的。改嫁一箇也罷。〔旦云〕這王婆兒說的。是甚話。〔旦唱〕

〔那吒令〕一任我窮則窮甘心的受苦。你道他富則富我無心戀汝。〔媒云〕有那月舍十分生得俊美。〔旦唱〕一任他美則美我芳心不渝。〔媒云〕他更有戴的是燒手似金鳳釵。喫的是爽口似綿羊肉。又有十數箱子打眼目的好新衣服。你休悞了這親事。〔旦唱〕便將着燒手般金鳳釵。便有那爽口的綿羊肉。更將着十數箱打眼目的衣服。

〔鵲踏枝〕我其實不相孚。我心內半星無。一任你數黑論黃。我其實惡紫奪朱。〔媒云〕那月舍是宦官人家舍人。你肯嫁了他。久後便是夫人縣君。〔旦唱〕我也無做夫人的分福。只甘心向萱堂奉養尊姑。〔卜上云〕老身是錢鎖

兒的母親。今年七十三歲了。有我媳婦兒趙氏。十分孝順。只被那說媒的王婆兒時常來哄他。打攪的無奈何。我媳婦兒立的行止端正。一世不被他哄了。今日又在前房炒鬧。老身特來將兩句言語趕了那婆子去。着我媳婦兒寬心些。〔做相見罵了〕〔媒放潑了〕〔旦云〕妳妳休惹他。他這說媒的都不是好人。

〔旦唱〕

〔醉扶歸〕他則待敬錢物如他父母。愛鈔貫似他宗族。若許了他錢呵。他便着暖水兒溫存了比目魚。憑着他撮合山的言詞固。若錢無呵直說的江乾海枯。則他這巧舌頭便是箇姻緣薄。〔媒云〕我見你家艱難。好心來與你保一箇親事。到被這窮婆子罵了我這一場。你這媳婦兒生的有顏色。又年紀小。我看守的你幾年。〔媒下〕〔旦唱〕

〔金盞兒〕我則待樂貧居。守窮廬。每日家緝麻紡線學經布。爲女的勤攻針指爲男的力耕鋤。我則待和霜挑野菜。帶雨種春蔬。到春來柔桑呼伴採。到冬來村酒喚鄰沽。〔旦云〕妳妳年高了。正當自加保養。寬心度日。似那媒婆每的閑話。是必休繫在心懷。你媳婦不比他人。便夫主十年不回。媳婦兒奉侍妳妳十年。永遠不改了此志也。〔旦唱〕

〔賺尾〕我常則守一片孝心堅。養百歲萱堂暮。便是妾平生愿足。侍養的

年老慈親樂有餘。奉晨昏康健安居。自供廚。將飲饌甘腴。則愿的當軍  
去的兒夫早早的歸故廬。那其間向堂前戲舞。妳妳呵你守着親兒親婦。樂  
堯年舜日永歡娛。〔下〕

〔李辦老趙上云〕老夫是趙友諒。想自從前年將我女兒官保嫁與了錢家。如  
今女婿錢鎖兒。又口北操練去了。他家下十分艱難。爭奈我老妻性兒不善。自  
女兒嫁去之後。一向不會上他門去。如今正遇寒食節令。家家上墳祭奠。老夫  
有十餘兩銀子。又難親自送與女兒。只得令我兒子喜兒童兒。二人在他墳頭。  
與他妹子相見。就付與女兒。〔做喚二俵上〕〔李云〕今日寒食。便收拾春盛擔  
子。安排酒果。與你母親一同上墳去。將這十餘兩銀。若見你妹子官保。暗暗地  
付與他做盤纏。休着你母親知道。老夫在家。你母子三人便去上墳去也。〔下〕  
〔淨辦月舍上云〕小子便是月舍。爲那錢家小娘子。小子茶裏飯裏想着他。今  
日正是禁烟寒食一百五日。家家上墳去。想必錢家媽媽。引他媳婦也去上墳。

小子就那墳上。好歹要營勾了他。〔下〕〔卜上云〕老身是錢婆兒。自從我兒子鎖兒去了。哭得我眼也花了。幸有媳婦兒十分孝順。侍奉老身。將就過日。今日是寒食之節。老身要去亡了的夫主墳頭燒一陌紙。須索同媳婦兒去走一遭。〔喚旦科〕〔旦上〕〔卜云〕今日是寒食之節。常言道。若要富。敬上祖。媳婦兒我和你將些錢紙。去你公公墳頭拜掃去來。〔旦云〕媳婦兒恰纔問鄰舍趙媽媽家。除了一壺兒酒。將着酒便跟妳去也。〔虛下〕〔辨鄰舍趙媽媽上云〕老身是這錢媽媽鄰舍趙婆兒。可憐他那媳婦兒十分孝順。家中艱難。問我除了一瓶兒酒。去祭他公公。我如今也去上墳。就將些飲食酒果。到墳上請他同喫咱。〔下〕〔卜旦上〕〔旦手提酒紙跟卜上云〕兀的早出城來到郊外也。看了城裏城外是好春景也。〔旦唱〕

〔南呂一枝花〕小窗前呢喃燕語忙。高柳外呢呢鶯聲細。鬧花中蜂鬚粘。蕊去。芳徑裏蝶翅撲香歸。節遇寒食。看東舍西鄰內。正踏青鬪草期。我則

見暖融融杏花天紅粉牆頭。綠茸茸芳草地鞦韆影裏。〔卜云〕媳婦兒你聽。  
兀的甚虫蟻兒叫的十分悽慘。〔旦唱〕

〔梁州第七〕則見那密林中喚幾聲不如歸啼殘杜宇。斷橋邊聽一回行不得也叫損山雞。又被這潑毛團引起我相思意。知他在黃沙磧裏。白海坡西。黑松林畔。紫嶺山隈。知他在那答兒忍冷擔飢。好教人費寢忘食。則愿他向漠南秉忠心建節成功。則愿他成塞北施勇力於家爲國。則愿他到朝中受深恩蔭子封妻。好着我行里坐里。一聲聲忍不住長吁氣。要相見不容易。險些兒一上青山化做石。望的他回歸。〔旦云〕想起俺兒夫來哭了些。怕妳妳回頭來看見呵。傷感了妳妳的心也。〔旦唱〕

〔隔尾〕我待恓惶呵尊堂年老怕傷着他情意。不恓惶呵夫婦情深怎止的住悲。我則索暗搵了撲簌簌香腮上兩行淚。呀呀呀。俺妳妳若問我衣襟上水濕。你着我支吾箇甚的。哦。我則道遙望見墳塋哭來的跡。〔卜云〕來到

墳前也。媳婦兒裂下紙錢奠兩盞兒酒。燒了紙者。〔做祭墓一折了〕〔卜云〕我也走的困倦了。就這墳前睡些。〔卜睡科〕〔二俵上云〕俺是趙喜兒。童兒。父親使俺來上墳。就送這些銀子到錢家墳上與我妹子。這里是他墳園。妹子正在此。就暗暗地與了他銀子。便回去。〔做相見遞銀與旦科〕〔俵云〕上緊接了收了。俺回去也。怕俺娘尋俺。〔旦云〕哥哥每。且慢者。你將這銀子在荒郊野外與我呵。知他這銀子我從何處得來的。必索引您見了我婆婆說知了。方纔敢受您這銀也。〔旦唱〕

〔牧羊關〕多感我尊父相憐意。爭忝我尊姑尙不知。我暗暗地接了呵。知他是何處得的東西。〔俵云〕妹子這等孝順。你妳妳也不疑惑你。〔旦唱〕便不着俺妳妳心下猜疑也。引的那傍人每口中是非。〔俵云〕妹子好不會方便也。接了罷。俺怕娘來鬧。〔旦唱〕我怎肯見利而忘義。我則待見賢以思齊。〔旦云〕哥哥跟我來。〔旦唱〕喚醒我尊姑睡。說過了呵。拜別你兄長回。〔旦

做喚卜醒與二僚相見了。〔付銀與卜了〕〔相謝了〕〔貼淨急走上云〕我這  
兩箇小厮。不想走到這窮子墳上。帶了窮氣兒去俺墳內去也。您和那忤逆不  
孝的妮子說甚麼。來看他怎地。〔炒鬧一折了〕〔旦向前拜貼淨科〕〔旦唱〕

〔賀新郎〕我這里懷揣着箇羞臉兒笑嬉嬉。娘呵。你全是箇子母的情腸。  
娘兒每的恩義。你也曾回乾就濕勞心力。想起來教奴教奴淚滴。說着呵  
心似刀刺。我是你腸肚內親生女。須不是街市上買的奴婢。却怎生爲那幾  
文錢記眼做深讎氣。〔貼淨云〕好孝順女兒。到數落了我一篇。〔旦去〕官保勸

娘一句咱。〔旦唱〕娘呵。從今後你慈心常在念。你女兒想當日孝道不曾

虧。〔貼淨鬧引二僚下〕〔月上云〕小子今日出城來。尋了趙家小娘子一日。到這  
里方纔尋見溜兒。你喚過那小婦人來。〔喚旦與淨相見了〕〔淨云〕多聞大姐

名譽。今日見面。果然名不虛傳。〔旦云〕敢問官人貴姓。〔淨云〕小子姓丹。丹舍  
的便是小子。〔旦云〕原來又是那厮。〔旦唱〕



〔罵玉郎〕惱的我撲登登按不住心頭氣。我罵你箇無廉耻潑東西。〔淨趨搶云〕大姐罵一句兒。小子添一分精神。〔旦唱〕怎覷那迎奸賣俏的查胡勢。〔淨云〕小子也有換套兒的衣。揀口兒的食。小子家中十分富貴。〔旦唱〕我也不戀你那換套衣。不圖你那揀口食。不愛你那家豪貴。〔淨云〕大姐悄悄地依隨了小子却不好。〔旦唱〕

〔感皇恩〕你要我悄悄地依隨。我則待遠遠地相離。〔淨又近前科〕〔旦唱〕你休來意輕狂。身謊詐。眼迷稀。〔淨云〕我只拿一拿大姐手兒。〔旦唱〕湯一湯斷了你手腕。〔淨云〕我摟一摟兒也罷。〔旦唱〕摟一摟爛了你身己。〔淨又靠前科〕〔旦唱〕你莫相挨。你靠那壁。你休到我根底。

〔採茶歌〕我是箇營房內女嬌癡。又不是瓦子裏粉頭每。你怎敢亂人倫奸騙俺好人妻。我若是告到官司休後悔。則你這強奸罪犯得凌遲。〔淨近前摟住旦〕〔旦打脫就行着淨一同喝上摟着打一下唱一句〕〔旦唱〕

〔草池春〕顧不得自羞耻。索罵你。罵你箇潑浪漢精賊。我將他攔頰腮用手打只。他剗地饑眼腦也斜死勢。我抓揉了你面皮。碎扯破你衣袂。攔打腫你嘴鼻。揪擗亂你鬢髻。潑敲才你索知。怎比烟花娼妓。糊猴頭的樣勢。無些尊卑道禮。忒輕薄的所爲。真下賤的身體。披上一片人皮。精驢精馬養的。死了你箇醜顏。便猪狗也不喫。〔旦打住唱〕不由我氣一回打一回氣的我烘烘昏迷。哭哭啼啼。切切悲悲。怎遭着你。這潑賤的東西。他剗地亂作胡爲。抽回身便索疾忙退。我若是告到官。言就裏將法違。便看你精臀上刮肉。胯骨上無皮。〔淨云〕這潑婦到敢打我。又罵我。溜兒。我和你綁了他手。打上一頓去來。〔鄰舍趙婆兒將酒果上云〕甚麼人。這裏欺負錢家媳婦。〔做解勸了淨下〕〔趙同卜旦飲酒了〕〔旦云〕妳妳。天色晚了。好回去也。〔旦唱〕

〔尾聲〕我則索吞聲忍氣還家內。趙媽媽厚德深恩怎報得。〔趙云〕早不

被那賊營勾了你。〔旦云〕妾家累世清白。怎肯被他點流。〔旦唱〕那一箇大蟲門前。汪汪地有狗兒吠。立的我芳心正直。自小來頗知些道理。怎肯教敗壞了我清名點流了我體。〔緊下〕

〔辦樺老上云〕自家是這濟寧衛軍姓趙。人喚我做趙大。如今在這口北操練。有我鄰舍錢鎖兒一同在此操練。他在箇百姓老何家安下。老何見他性兒軟善。又生得有些人物好。要將女兒與他爲妻。招他做箇女婿。那錢鎖兒顛倒不肯。鎖兒又無盤纏。十分艱難。如今染患病疾。又無人做飯食與他喫。我曾累次勸他與老何做箇女婿。便有人看覷你。他說我自有一渾家。怎肯又娶人的女兒。今日聽得他病沉重了。便索看他去也。〔下〕〔末抱病上云〕自從來口北操練。不覺過了二年半也。如今染得病重了。多感何大公。早晚照覷。要將他女兒招我爲婿。我想來。怎肯忘了我渾家。在此別繼姻親。便餓死病死了。也不肯忘恩負義。我家中渾家。終是父母配對。縮角夫妻。怎肯做箇不仁不義之徒。每日何

大公使他女兒送粥來我喫。看了那女子心中。倒有動色。今日等他再來。若有些志誠呵。我將幾句言語羞了他。教他回去。〔貼旦擔粥飲食〕〔擔上〕〔做相見了〕〔貼旦云〕俺父母使妾來送粥與哥哥喫。〔末云〕大姐放下擔兒回去。〔貼旦云〕妾的這擔兒沉。便怎地放的下。〔末云〕休閑說。你回去罷。〔貼旦云〕哥哥。你上緊舀這熱粥喫些。休等的冷了。無滋味了。〔末云〕無滋味也罷。你回去。你是好人家閨女。怎生這般快口饒舌。你自不害羞。〔貼旦云〕我好心可憐你在客中。送粥與你喫。你倒將言語羞我。趕我。再也不來看你了。〔下〕

〔樺老上云〕我是趙大。不知錢鑽兒害的怎生了。特來看他一看。〔做相見了〕

〔樺云〕你今病體沉重。我告了官人。乞了半日假。扶你去楊太醫家看一看。多討幾服藥。醫治你這病咱。〔下〕

〔另辦樺老上云〕我是小宋。如今口北操練的軍都回家。俺濟寧一衛的有一名錢鑽兒。只前日病故了。難得他鄰舍趙大哥。與他燒化了。收拾了他骨殖。又做了箇羅木匣兒盛了。帶回濟寧去也。俺一行

五六人先回去。我先到他家時。報與他娘和他媳婦。教他來接他骨殖也。〔下〕  
〔卜旦上〕〔卜云〕媳婦兒。我聽得隔壁趙媽媽說。操練的軍都回來也。不知我  
兒子鎖兒幾時到家。〔旦云〕他必然比別人先到家。上有妳妳年老。他是箇知  
道理的人。怎肯稍停。不早來見妳妳。〔小宋上〕〔相見了〕〔說關目了〕〔卜旦  
哭一折了〕〔旦云〕未知如今到何處了。〔末云〕趙大哥。將着灰骨匣兒。敢今  
日投晚到十里鋪也。〔旦云〕妳妳。且到趙媽媽家坐半日。媳婦兒。央及趙大嫂  
相伴着。便去接丈夫骨殖去也。〔盧下〕〔旦同趙大嫂上〕〔趙云〕百忙里下着  
大雨。出的這北城門。幾時到那十里鋪。〔旦云〕大嫂可憐見。相伴媳婦去走一  
遭。〔旦唱〕

〔正宮端正好〕雲鬢黷釀出我一天愁。風淅瀝感動我千重悶。雨淋漓添  
上我些痛洒洒的啼痕。路回答濕透我鞋兒襯。泥滑擦行不得也。強把身前  
進。

〔滾綉毬〕我則見紅滴溜的染楓林霜色勻。乾此刺的敗池荷露氣新。亂紛紜的碧天邊晚鴉成陣。聲伊呀寫長空新鴈來賓。我這里荒篤速的盼遠村。呆答孩的月斷魂。短局促的望前途滿懷愁恨。恨不得沒揣間到郵亭與兒夫的骨殖相親。我受了些捱悽惶二年凍餓千般苦。抵多少成繾綣一夜夫妻百夜恩。說起來也嘴盧突的傷神。〔趙云〕兀的早到十里鋪也。我試在鋪門外喚趙大咱。〔做喚了〕〔趙大上相見了〕〔旦接見哭了〕〔趙云〕走的我乏了。

趙大來扶我一扶。〔旦唱〕

〔倘秀才〕可憐見脚打着腦杓子走得他半昏。好着我手攔着胸脯兒哭的。我氣損兒夫呵。我爲你千里關山斷夢魂。從今後相思常有恨。要見永無因。〔旦近前抱住骨匣哭科〕〔衆勸科〕〔旦唱〕我抱着這匣兒呵。是俺夫妻義分。

〔滾綉毬〕兒夫呵。我爲你也會罵謊喬才數議婚。我爲你呵。也會被老親娘幾

遍噴。爲你呵。我也曾奉尊姑不辭勞困。爲你呵。我也曾捱蠶鹽獨守閨門。爲你呵。將綾羅不上身。爲你呵。把胭脂不到唇。爲你呵。亂蓬鬆世不曾攏光雲。爲你呵。捱了那冷清清數載黃昏。爲你呵。淚淹淹哭泣昏花了眼。爲你呵。瘦怯怯腰肢掩過了裙。爲你呵。暗暗地銷魂。〔旦云〕我將着一碗兒漿水。一陌紙錢。就這鋪裏先祭他咱。〔旦做燒紙奠酒了〕〔旦拜哭着唱〕

〔倘秀才〕我將這半碗兒涼漿不溫。我將這一陌兒銀錢恰焚。〔趙云〕你看。你看。一箇旋風兒。捲着紙錢灰。遠定他渾家。〔旦唱〕你道他足律律的旋風兒不離我身。〔旦云〕您都靠後些。俺男兒害羞。〔旦唱〕他從來有些兒腩腆。

〔趙云〕莫敢你丈夫噴你來的遲了。〔旦唱〕他自小無半點毒根。他則是回避您衆人。〔趙大嫂云〕俺將着骨殖匣兒回去了罷。〔衆下〕〔月上云〕因緣天對付。好事不須忙。小子。便是月舍。聞知錢鎖兒口北去死了。有他那渾家。我使用一千兩銀子。也要娶了他。如今便使媒婆說去也。〔下〕〔卜同老姨婆兒上云〕

媳婦去了不見回來。老身買下酒果錢紙。等我兒靈柩來家。與他祭奠一盞兒酒也。〔旦將切末上做相見哭住〕〔旦奠酒祭卜哭科〕〔旦勸卜科〕〔旦唱〕

〔呆古朶〕人生壽夭天難問。我這里哭啼啼哀告慈親。自願養只愿加餐。自珍重須常保身。妳妳呵。權撇罷了心中想。略寬解些胸前悶。但管取窮媳婦守一生孝不衰。只愿得老萱堂享百年永壽穩。〔趙婆揭上云〕老身是趙

大的母親。將着香紙。特來與錢家大哥靈前奠一盞酒。〔做奠酒哭了〕〔旦云〕趙媽媽我有一句話。囑付媽媽可肯依我。〔趙云〕大姐但說的。老身都依了。

〔旦云〕想我夫主在時。尚且有人來說媒。又來要營勾我。如今夫主亡了。我是箇寡婦。怎生自做得主張。古人常言。好馬不韉兩鞍。好女不嫁二夫。今欲待尋箇自盡。爭奈我婆婆年老無依。無人侍養。如今囑付媽媽。若肯念媳婦這一點孝心。早晚照覷我婆婆。送他老了。也不辜負了媳婦的心愿。〔趙云〕大姐寬心。

老身姓趙。你也姓趙。又是近鄰。我怎生不照覷你婆婆。〔旦云〕媳婦兒囑付媽



媽幾句咱〔旦唱〕〔拜一拜唱一句〕

〔叨叨令〕您媽媽待慈親每日家相親近。〔趙云〕我和他隔壁兒住着常常

在一處。怎肯不親近。〔旦唱〕愿媽媽件慈親每日家寬他些方寸。〔趙云〕

我每日勸他寬他心。休想兒子。怎肯不勸解他心。〔旦唱〕愿媽媽與慈親飲

食上頻頻地相問。〔趙云〕我但有喫的便請他一處喫。我怎肯不問他。〔旦唱〕愿

媽媽看慈親衣服破與他縫些衫襖。〔趙云〕我家媳婦兒女兒常與他洗衣裳。

縫破綻。怎肯不顧盼他。〔旦唱〕兀的般我放心也麼哥。兀的般我放心也

麼哥。便是到做陰魂也報答你深恩信。〔旦云〕妳妳。你每在靈前坐一坐。媳婦

兒走的困了。房中歇一歇去也。〔旦唱〕

〔尾聲〕我則待守貞心便把身爲殉。我已自秉烈性難將孝道存。囑付了

萱堂與近鄰。分付了亡靈與老親。我欲待遺留下清白勸後人。做一段

綱常好話論。比及里礮可可咽喉自伏刃。不如向裙帶的圈兒上。身亡方

纔證了本〔旦下〕

〔卜云〕媳婦兒睡去了。俺衆人守着靈坐一會兒。〔媒上〕〔做與卜趙都相見了〕〔媒云〕請出趙家小娘子來。老媒婆有一句話和他說。〔趙云〕我去喚他出來。〔趙虛下急走上叫云〕救人。救人。〔卜驚科〕〔趙云〕趙大姐房中自縊死了也。快去救一救。〔同媒衆趨下〕

〔辨尊子隊上云〕人間私語。天聞若雷。暗室虧心。神目如電。吾乃東岳之神。這廟門前有一孝義之家。昨夜有他媳婦。爲因夫死。自縊而亡。貞烈之性。古今亦罕。吾今速報司上申天庭。下拔幽爽。蒙上聖救命。皆證仙果。賜他夫婦二人。男號義仙。女號貞姬。如今必來參拜我廟。方去證果朝元也。〔末旦辨仙童仙女上云〕妾乃是趙氏官保。爲因守志自盡了。東岳爺爺差速報司。上稟天庭。賜我仙號。名是貞姬。有我夫主錢鎖兒。爲因患難中不肯忘恩負義。不肯停妻娶妾。有此夫婦之義。賜他仙號。名是義仙。如今妾身深受本處東岳爺爺大恩。則

索與夫一同相謝尊神。又恐妾的親父母。聞知妾自縊身死。必去錢家門上炒鬧爭訟。索我婆婆償命。倒是妾死的不孝了。只得同夫主到五更初。去妾本家。托一夢境。與妾父母先知。不去禁持我婆婆。又且着這世上人。聞知俺兩口兒成了仙道。勸他那愚夫濫婦咱。妾想來我和你這一段因緣。非同小可也呵。

〔旦唱〕

〔雙調新水令〕在人間曾結下死生緣。今日箇鬼窟中又還相見。到如今瀛洲上重栽連理樹。瑤池內再長並頭蓮。今日箇得做神仙感東岳大恩眷。

〔駐馬聽〕兒夫呵。想當日身入軍編調劣馬騎來四五年。到如今名書仙卷。跨馴鶴飛上九重天。一生節義古今傳。千年標寫在賢達傳。昔曾言爲人忠孝的神明羨。〔末云〕入這廟來。青松翠柏籠罩殿宇。好雄壯也。〔旦唱〕

〔喬牌兒〕翠巍巍古柏鮮。密蔭蔭罩前殿。我則見神光朗耀祥雲現。俺這

里曲躬躬參聖顯。〔末旦做拜罷尊子了〕〔淨云〕你二人今日成了仙道。人世間必然人旌表你家門戶。這是積陰功陽行報應的道理。况這鄒魯之邦。乃孔夫子大聖人所生之地。自然人知道義。戶出賢良。又正遇當今聖世仁風所被。教化薰陶。所以有如此守義之夫。盡節之女也。〔旦云〕俺謝了上聖。便去我父母家。恐他知妾身亡了。必去妾的夫主家與婆婆爭訟。妾今同夫先至妾父母家。托一夢境。將前後之事。備告親知。以存妾在生孝於尊姑之道也。〔下〕〔尊隊下〕〔李貼淨上〕〔李云〕老妻。你如何一夜睡不着。攪的老身一夜也無眠。〔貼淨云〕老不曉事的。我纔待睡着。你絮絮聒聒說甚的。休則聲。睡了罷。〔李貼淨睡科〕〔末旦上〕〔旦云〕出了廟前。我三年不到我家了。也忘了那一箇門兒是。轉過後園。兀的這是我父母家也。且穿上這舊衣服去。怕驚了俺父母。〔旦唱〕

〔鴈兒落〕我這里冷清清入後園。悄促促來深院。腳輕輕到臥房。手欵欵

推門扇〔旦云〕入得這房內。丈夫你看波。〔旦指科〕〔旦唱〕

〔得勝令〕這是我鋪過的細絨氈。〔旦又指科〕〔旦唱〕這是我貼過的舊花鈿。〔旦又指科〕〔旦唱〕這是我綉不了的鴛鴦被。〔旦又指科〕〔旦唱〕這是我描不成的並蒂蓮。〔旦摀淚科〕〔旦唱〕怎生我嫁了這二年。尙留着這閑針線。哦。也是我父母每想兒女的心堅。因此上常常的放在眼前。〔李貼淨起身。做與旦末相見了〕〔貼淨云〕噴到老身一夜睡不着。原來這窮漢回家來了。我從來不曾要你夫妻上門。你今日又不害臉羞。來怎麼。老兒快與我點湯。點湯。〔旦云〕娘。你到今日還這等利害。俺爲了仙也。〔貼淨云〕甚麼仙。凍仙。餓仙。〔旦末脫了舊衣仙辦上云〕娘。你看俺是誰。〔貼淨見神云〕你每怎生改變的這般霞衣鶴氅了。老兒快與我奠酒。奠酒。奠酒。〔旦云〕也不索娘點湯。也不索爺奠酒。試聽你女兒訴一篇咱。〔旦唱〕

〔水仙子〕只因爲鸞孤鳳隻喪黃泉。〔淨云〕他說他女壻死了。〔旦唱〕因此

上瓶墜簪折將綉帶懸。〔李云〕女兒說他綉帶兒自縊了。〔旦唱〕到如今花殘月缺休嗟怨。則是你女孩兒緣分淺。〔貼淨李扯住旦哭科〕〔旦唱〕老雙親省可里熬煎。俺如今紫府內爲了天眷。丹臺上受了簡編。須不是受凍餓的神仙。〔貼淨云〕休題舊話。我且問你因甚亡了。來仔細對我說咱。〔旦云〕女兒備細訴與父母聽也。〔旦唱〕

〔折桂令〕正青春二八當年。恰結上絲蘿。早剪斷冰絃。俺兒夫他在那紫塞外一命身亡。因此上妾向這綉帶上三生夢斷。都只爲青燈下百載情牽。我因他立節操芳心不轉。他因我守恩情病體相纏。妾死了呵怕父母與我聲冤。爭訟相連。因此上訴說衷腸。休要問俺婆婆索命償錢。〔貼淨云〕女

兒女婿。你如今爲了甚神仙了。〔旦云〕你女婿。因他不肯背了我。另娶妻室。有此義氣。天上號做義仙。女兒因爲夫主自縊身亡。天上號做貞姬。如今見了父母。訴了衷腸。便去證果朝元也。〔貼淨扯住旦〕〔貼淨云〕常言道一子成仙。九

族生天。你索帶你父母上天去也。(旦唱)

〔鴛鴦煞〕常言道天曹自有天曹選。神仙自是神仙眷。娘呵。你且莫相纏。聽我良言。唱道上天人間。陰陽不舛。爲善心堅。這報應非遙遠。禍福昭然。我將這團圓事特來夢兒中顯。

行孝道勤把尊姑奉

題目

守烈性感得神天動

錢義仙生前夫婦情

正名

趙貞姬身後團圓夢

新編趙貞姬身後團圓夢





奢摩他室曲鼓

雜劇之屬  
誠齋樂府

# 香囊怨

據宣德憲藩本校印

上海涵芬樓印行

# 新編劉盼春守志香囊怨全寶

〔貼淨辨長髭鬚上云〕無錢淡淡相看。有鈔朝朝廝趕。別無買賣營生。專靠幫閑鑽懶。小子姓胡。名然。字子滾。是胡子轉的後代。自小頗讀兩行書。人稱呼小子做胡先生。近日有箇松江府客人陸源。十分有錢。將着二千引鹽。在店裏安下。前日小子見他說。要去這院裏揀一箇女孩兒梳攏他。小子看來。只有那樂人劉鳴高家有箇好女子。從來不曾有人喫酒。小子保與那鹽客。今日便去約他走一遭。〔下〕〔正淨辨陸客末辨周恭上〕〔正淨云〕小子姓陸。名源。字牛皮。是松江府客人。將着些鹽來汴梁賣。此間認了箇朋友姓周。名恭。字子敬。他是在城良民之子。也有些學問。志誠老實。今日與他一同作伴。尋那胡子滾先生。引俺到院裏散悶走一遭。這早晚了不見胡先生來呵。〔貼淨上相見了使貼老作禮了〕〔云云了同下〕〔外同卜旦旦上〕〔外云〕自家姓劉。是這汴梁樂

人院裏一箇出名的末泥。年小時子弟每見我唱得好。與了箇樂名。喚做鳴高。如今年老了。有我婆婆。當着這窮家緣過活。有箇女孩兒。年長一十八歲。名是臘兒。四般樂器皆能。酒席上老先生每見孩兒能彈快唱。與了孩兒一箇名字。喚做盼春。昨日有胡子滾來說。有箇賣鹽的客人。十分有錢。要來俺家喫酒。婆婆教孩兒打扮了。調下樂器伺候着。那客官每來也。〔卜云〕女兒你快打扮的。豔着。搽上一斤粉。半斤胭脂。等那喫酒的來時。務必多要他些錢。〔旦云〕妳妳。你只爲那兩貫錢鈔。這等費心。女兒的心與娘的心兩別。〔卜云〕有甚麼兩別。不着錢養家。你喫甚麼。穿甚麼。〔旦云〕妳妳。天下愛錢的。不曾見你。這般錢上緊。你聽我說咱。〔旦唱〕

〔仙呂點絳脣〕你則待錢蓋門楣。錢鋪塔砌。你則待鑽在錢內。將錢做床席。橫躺在錢堆上睡。

〔混江龍〕你則待錢爲親戚。見了那幾文錢便是好相識。錢爲你姊妹。錢

是你妯娌。獎的這會覓錢的。孫兒能劫寨。常則教慣使錢的子弟納降旗。也不怕錢多害己。你則待錢少相離。常則把錢財愛重。常則教錢物堆積。見一日無錢呵。至少也有五百遍。長吁氣。若無錢呵。一任你聰聰俊俊。但有錢呵。管甚麼囉囉回回。〔末淨貼淨同上〕〔做相見了〕〔問姓名備云了〕〔貼淨云〕尊兄。今此女子。不比其他之妓。十分能彈能唱。記得有五六十箇雜劇。度新聲。〔旦云〕客官每要看甚雜劇。〔末云〕尊兄。及大姐。但是記得的清新傳奇。都數一遍俺試聽。〔旦云〕那鹽客到也平常。這索我數雜劇的是箇風流人物。我數一遍客官每試聽咱。〔旦唱〕

〔油葫蘆〕你教我做一段清新甚傳奇。我數與伊。我待要做一箇諸葛亮掛印氣張飛。〔末云〕這雜劇忒莽撞。〔旦唱〕我做箇王鼎臣風雪漁樵記。

〔末云〕這雜劇忒孤寒。〔旦唱〕我做箇關大王獨赴單刀會。〔末云〕這雜

劇也不甚雄壯。〔旦唱〕做一箇包待制雙勘丁。〔末云〕這雜劇有冤屈。〔旦唱〕做一箇黃魯直打到底。〔末云〕這雜劇不清秀。〔旦唱〕做一箇還鄉衣錦薛仁貴。〔末云〕這雜劇有些村野。〔旦唱〕哦。我做一箇李亞仙花酒曲江池。〔末云〕這雜劇傷着俺子弟每。〔旦唱〕

〔天下樂〕做一箇半夜雷轟薦福碑。〔末云〕這雜劇說着俺秀才每命不成。也不要。揀小生不曾見的新雜劇做一箇。〔旦唱〕你教我做一箇新的。有一箇雙鬪醫。〔末云〕這雜劇說箇病人。有些不利市。〔旦唱〕做一箇日本兒進西施的越范蠡。〔末云〕說着那勾踐無道。也不要。〔旦唱〕做一箇李太白。〔旦唱〕做一箇蘇子瞻遊赤壁。〔末云〕這兩箇雜劇都是遭貶的。也不要。〔旦唱〕做一箇泣樹的田真是軟末泥。〔末云〕這雜劇也冷淡。〔正淨云〕大姐怎生記得偌多雜劇。〔貼淨云〕大姐記的還有哩。〔旦云〕我解說着數與你。隨你要看那一箇雜劇。〔旦唱〕

〔那吒令〕你待看勸朋友的傳奇。做一箇管寧割席。你待看存陰隲的傳奇。做一箇劉弘嫁婢。你待看貞烈婦的傳奇。做一箇秋胡戲妻。〔末云〕這三箇雜劇都文飾。也不要。〔旦唱〕做一箇狂夫呵有煮海生。做一箇怨女呵有臨江驛。〔末云〕這兩箇雜劇是秀才每不仁不義也不好。〔旦云〕哦有一箇風月傳奇。〔旦唱〕做一箇賞黃花浪子回回。〔末云〕大姐別有甚傳奇。再數幾箇小生聽。〔旦唱〕

〔鵲踏枝〕做一箇別虞姬。做一箇杜鵑啼。做一箇鑿壁偷光。舉案齊眉。做一箇黑旋風山兒李逵。做一箇賢達傳孟母三移。〔末云〕都不要。只索大姐做箇花旦雜劇。〔旦唱〕

〔寄生草〕有一箇寄恨向銀箏怨。有一箇志賞在金線池。有一箇崔鶯鶯待月西廂記。有一箇董秀英花月東牆記。有一箇王月英元夜留鞋記。有一箇蘇小卿月夜取茶船。有一箇呂雲英風月玉盒記。〔末云〕這玉盒記正

可我心。又是新近老書會先生做的。十分好關目。是那奴婢土安調唆他大娘子害他。他肯守志尋夫。後來團圓了。大姐便做這箇傳奇。俺看賞一回。〔淨辦末父親急走上云〕不想我的兒子周恭。又走在院裏喫酒。〔做鬧一折了〕

〔捉下了〕〔貼淨云〕俺自在此喫酒。就與大姐保此陸客官。在大姐處做一場子弟。今有五十兩銀。一對金釵與大姐。〔旦怒唱〕

〔醉扶歸〕空逗引蜂蝶意。枉約會燕鶯期。我從來做不慣迎新送舊的。又不比浪包婁求食妓。這歡會須隔着巫山那壁。告退渡楚宋玉權回避。〔淨云〕小子將着鹽賣了。儘勾與大姐家盤纏。休說錢財上做子弟。只憑着小子聰明標致。也奪了頭籌。〔旦唱〕

〔金盞兒〕休誇你百精細。百伶俐。虔婆每千斤碓敲得你天靈碎。油頭粉面都是些撮人賊。更有那俏姨夫如虎猛。嬌姐姐似狼飢。休信這巧舌頭伴孝順。甜話兒假慈悲。〔卜云〕孩兒。休悞了這一主兒好客人。他將着五十兩



銀子一對金釵。也不少了。你將就留下罷。〔貼淨云〕大姐將就收了。再着陸客辦箇大筵席留下罷。〔旦云〕我留了這陸客呵。便是我終身之計了。他久後少不得回他家鄉去也。〔卜云〕孩兒到那時。你再自揀箇稱心的俵兒留也不遲。如今且看他這錢面麼。〔旦云〕好女不配二夫。好馬不韉兩鞍。我既嫁了。怎肯再嫁。妳妳聽我說咱。〔旦唱〕

〔醉扶歸〕我雖是生長在風塵內。我常是操守的性剛直。我怎肯再嫁重婚做潑賤妻。嫌的是腌門逕無人義。〔旦云〕我既嫁了一箇了。休想又肯替你覓錢。〔旦唱〕既點流了我花枝兒般嫩體。休想我又引惹浪蝶狂蜂戲。〔淨云〕大姐若肯依隨了妳妳的話。留小子做箇女婿。小子一世也不回家去了。只在大姐家住。妳妳。小子再添上五百引鹽便送來。〔卜云〕女兒的性子剛直。老身不敢主張。你將這銀子和鹽對主兒交付。〔淨跪旦〕〔淨云〕大姐。小子再將五百引鹽來。大姐權收了這銀子罷。〔旦唱〕

〔賺尾〕留着你財物作經商。鹽貨圖些利。休送入滑擦擦琉璃井底。俺這門戶錦陣花營列的整齊。但來的一箇箇着迷。〔旦云〕客官只將蘇小卿比呵。你試聽咱。〔旦唱〕想馮魁那箇呆頑。干送了三千引新茶落箇甚的。船到了金山寺裏。那蘇卿打聽的雙生及第。他又早向回廊壁上暗留題。〔末上云〕小生是周恭。字子敬。數日前同朋友每至院裏劉鳴高家喫酒。被我父尋到他家。鬧了一場。趕回我來了。我自當此一日。見了他那女子盼春。兩情相戀。一向放心不下。昨日央及箇朋友去他家說知了。今日小生家中暗藏了兩卷細布。三五兩銀子。就帶將去。看那姐姐有心呵。小生也去院裏做一番子弟。今日約了朋友弟兄。便索去走一遭也。〔下〕〔旦同卜上〕〔旦云〕妾身是劉盼春。昨日有箇閑人來說。那周恭要來俺家喫酒。我看了此人格溫柔。姿質聰俊。必然是箇風流人物。妳妳。若那俚子來時。安排些整齊酒相待他。〔卜云〕女兒。你心中看上那俚子。他是此間在城人。只怕無錢。但留他在家。便難

打發他去了。纏門纏戶幾時是了。〔旦云〕若是你女兒的因緣配匹。也不揀是何處的。只怕留了箇村拗愚濁之人。便是我一世前程也。〔末同三箇人上做相見了〕〔飲酒了〕〔請旦彈唱了〕〔末云〕據大姐標致風流。出格之妍。能彈能唱。不在李亞仙之下。〔旦唱〕

〔子模〕賞花時〕你道我標致風流出格妍。我怎比汧國夫人李亞仙。我是箇

花胡洞女嬋娟。恰會把箏箏自演。常則在歌扇底舞裙邊。〔末云〕妳妳。不棄

小生薄禮。今有兩卷兒細布。五兩白銀。權且收留。小生愿情與妳妳做箇女婿。

〔卜云〕這周生說的是甚話。你纔到俺家。不曾喫的兩遭酒。怎地便要梳攏我女兒。〔旦云〕妳妳。我看了周生是箇聰俊人物。留了他罷。便他梳攏的入馬錢少呵。不强如前日那鹽客。〔卜云〕前日那鹽客。將着五十兩銀子。五百引鹽。梳攏你不肯。如今這俵子這些兒東西。做他零的也不勾。〔旦唱〕

〔么〕妳妳休只顧貪圖他入馬錢。但得箇知心的是宿緣。常言道夫乃是

婦之天。若成了歡娛繾綣。儘今世永團圓。〔卜云〕收下這些東西罷。我的箇黃花女兒。與了你梳攏。明日只要你做一箇大大的筵席。〔卜又云〕收拾了後房。招這周生做女婿。我去尋丈夫劉鳴高與他說知。遞箇狀兒與色長。〔下〕  
〔末日同下〕〔貼淨正淨上〕〔貼淨云〕小子是胡子滾。數月前引陸哥到院裏。保與劉家一箇女兒。被那女子性兒直拗。不肯留陸哥。今日方纔聞知劉盼春留了那周恭。有兩箇月了。每日在他家去。周生的父親十分嚴切。想是不知他兒子在彼行走。俺今日只做尋周生去。對他父親說知。必不放他去也。〔淨云〕正是如此。正是如此。待周生不敢去他家了。尊兄却說與小子。〔同下〕

〔辨貼旦一人上云〕俺是趙蓮兒。李葉兒。昨日西門裏有一主兒喚俺去唱。今日等劉盼春不見他來。俺一同尋他上街去唱去也。〔下〕〔辦茶二婆上云〕自家是這鼓樓東賣茶的。開着茶房。看有甚人來。〔末上云〕小生是周恭。自從在劉盼春家梳攏了他。過了三五箇月。不想此女子十分志誠端正。溫柔聰慧。俺

父親家中嚴切。如今常常拘束着小生。有半年不敢去大姐家去了。我聽的人說。大姐爲我不肯再留客人。每日只出去唱。行院人家。靠那唱也不濟事。討得多少錢物養家。我今日上街去。倘或茶房酒店裏。遇着大姐時。寫兩箇字兒教他休等我。留了客人每罷。也省得他父母每禁持絮聒他。來到這茶房討盞茶。噢。〔做與茶三婆相見了〕〔旦同二貼旦上〕〔貼旦云〕自院裏出來到街上。不覺又晌午了也。妹子。你早些起。早早的去唱也好。那請客的到等俺哩。〔正旦云〕姐姐每想俺行院人家婦女每十分艱難。噢的衣鉢又醜醜。又不曾得一日快樂。姐姐聽我說咱。〔旦唱〕

〔正宮端正好〕喚官身。當祇應。幾曾得片時間心上消停。不付能有一日剛寧靜。又有那叫唱的相催併。

〔滾綉毬〕這條街走的那白道兒生。遮莫是黑地裏行。便是夢魂中也迷不了。這答兒行逕。赤緊這鼓樓東市井豐盈。車碾的泥轍深似坑。馬踐的塵埃滿。

面生。則我這綉鞋兒世不曾乾淨。走的人可不丕氣喘心驚。盼不到徐家酒店張家館。恰過了馬氏錫房管氏庭。好着我感嘆傷情。〔貼旦云〕妹子俺這衣鉢是這等。便辛苦也無奈何。〔旦云〕姐姐到那筵席上費了自己的精神。取別人的歡笑。實是命不成也。〔旦唱〕

〔倘秀才〕一會家行行里忽然自省。也是我惡緣業前生注定。抵多少十二金釵按錦箏。唱呵唱的人乾了咽喉。舞呵舞的人軟了身形。得了那幾文錢。知他要怎生。〔貼旦云〕妹子若不唱呵。家中喫甚的。俺這等人家。男子漢又不會做買賣。全靠俺婦人家做營生。〔旦云〕且休說這出去唱。只俺行院每爲人一世。人不曾道俺箇是的。你聽我說。〔旦唱〕

〔滾綉毬〕靠前呵官長每罵俺忒自輕。靠後呵子弟每怪俺不順情。志誠呵又道是老實頭。不中親幸。隨和的又道是看不上輕賤身形。年長的人道是巴錢儉。年幼的人道是小鬼精。年高的人道是老虔婆。狠毒心性。但有些錢呵

又道是豪旺了那五奴撇了。我想來便驢騾也與他槽頭細草添二和。便猪狗也道他命裏麤糠有半升。偏俺這樂人家寸步難行。〔貼旦云〕俺姊妹每且到這茶房裏歇一歇。討盞茶喫。〔做與茶三婆相見了〕〔旦云〕隔壁有箇男子漢聲氣。說話是誰。〔茶三婆云〕你休問他。他不是喫酒的。〔末云〕這說話的好似盼春姐姐也。〔末喚〕劉盼春大姐。〔旦唱〕

〔倘秀才〕那箇在茶房中題着我小名。我這里哎哎地連應了他數聲。

〔做相見了〕〔旦唱〕哦原來是舊日劉郎到武陵。不由我淹地將眼覷。扎地早心疼。甚風兒吹你到這宣亭。〔旦云〕你這識字人出來的一箇箇忘恩負

義。怎生就不來俺家走一遭了。〔末云〕大姐休怪。小生出於無奈。家尊性嚴。每日打罵拘束的緊。所以不敢到大姐家。小生一言難盡。心間之事。今有一封書簡。一首小詞。本欲央及茶三婆送至大姐家。不想今日親自相逢。邂逅之中。官不能盡。恐尊親又知在此與大姐相見。命不可保。今便告回。所有衷腸。盡見簡

內。〔旦云〕妾不能識字。你試念一遍妾聽。〔末取書簡念云〕情人周子敬。拜上  
心友人劉氏盼春大姐粧前。睽遠恩愛。又越歲華。一自別來。思念愈切。雖相去  
於咫尺之間。如阻隔於千里之外。魚沈鴈杳。有信難通。鳳隻鸞孤。無緣可會。念  
吾之風流雲散。畏嚴訓於椿堂。思爾之月約星期。被防閑於萱室。玉欄綆斷。墜  
井底之銀瓶。錦袋塵濛。暗粧前之寶鑑。空餘半幅寒衾。彷彿似蝴蝶夢中家萬  
里。愁聽數聲殘角。淒涼如子規枝上月三更。獨對青燈。閑居白屋。念情人於舞  
裙邊歌扇底。無復望舊日因緣。盼佳期於茶房前酒館內。豈重續當時繾綣。春  
花秋月。朝朝美景亦成空。暮鼓晨鐘。夜夜芳心都擊碎。雖不曾依依楊柳。門前  
繫馬有誰家。常則是泛泛桃花。洞裏尋春無我輩。縱遠鶯朋燕友。難禁蝶使蜂  
媒。既居於月戶雲窗。莫吝於雨期雲會。花胡洞不可久孤眠。錦排場豈能常獨  
坐。休把樽空雲子酒。莫教衆怨雪兒歌。多囑情人。深知心友。願順乎薄嬾之情。  
以從夫狻狷之計。風塵院宇。權爲送舊迎新。花月樓臺。且作隨機應變。既爲了



周家姬。劉家女。念伊本自心堅。便作箇張郎婦。李郎妻。知爾實非情愿。暫時依彼。將就瓦全。終日違他。恐防玉碎。倘能見聽。事切於衷。願勿懷疑。言止於此。所綴小詞一篇。調寄長相思之令。謹錄于左。秋氣漸涼。順時自愛。不具備。詞云。

憶佳期。盼佳期。欲寄鸞箋。鴈字稀。新詞和淚題。怕分離。又分離。無限相思。訴與誰。此情風月知。〔旦云〕聽了這一篇書簡詞意。是好才思也。周生呵。越添上我這相思也。〔旦唱〕

〔呆骨朵〕我將這一篇詞珠玉般牢收定。似心肝氣命兒般看承。向我這抹胸兒裏貼肉忙揣。將這箇荷包兒裏隨身緊盛。看了這噴萬顆珠璣整。吐千丈虹霓盛。好教我訴情懷感慨多。專爲你有胸襟才思逞。〔末云〕大姐爲小生呵。多被母親禁害。千萬休爲小生自受熬煎。〔旦云〕我爲你不得相守呵。

〔旦唱〕

〔脫布衫〕恰便似虛飄飄線斷風箏。我如今實不丕帳冷雲屏。碧熒熒燈

殘短檠。寬綽綽。紐松方勝。

〔小梁州〕想着這羅帶同心結未成。好教我兩淚盈盈。瑤臺指冷鳳凰笙。添悲興。兩處苦傷情。

〔么〕別來難把鱗鴻倩。少相思。省可里牽縈。憑着我心志誠。身端正。便化作望夫石。也堅等到河清。〔末云〕小生恰纔書簡不道來大姐休爲小生守志。自受熬煎。依你母親留人接客罷。〔旦云〕周生。你說的是甚話。我怎肯再嫁人。

〔尾聲〕我當是香消斗帳人孤另。月落紗窗夢不成。彈也難同舊日情。唱也無心。喝采聲。席上愁陪。慌後生。家內常防劣柳青。割捨了殘生潑性命。唱叫揚疾幾遍爭。我則待獨守孤房自由性。將我這可意的情人。耐心兒等。

〔淨上云〕小子是陸源。字牛皮。自從當日去院中劉鳴高家喫酒。一心要梳攏他那女兒。爭奈他女子不肯聽從。我想來。敢只嫌我錢物少。我今又添上五十

兩銀。共該一百兩花銀。將與那大姐。他必然肯了。如今還尋胡子滾先生。一同去走一遭。〔貼淨上云〕小子是胡子滾。如今劉鳴高家女子無有客人了。那周生被他父母拘束。再不得去院裏去了。我去尋那陸客。多教他出一些錢物去他家使。小子好歹多落他些鹽用。〔做與淨相見云云了下〕〔卜上云〕老身是劉鳴高的渾家。自從我女兒盼春。留了周生。這些時周生也不來了。家中無一箇人津貼些盤纏。我女兒性子直拗。累曾勸他留人接客。他不肯聽。如今家中柴米都無有。十分艱難。喚出女兒來。再與他商量。教他留箇客人養活老身。〔正旦上云〕妳妳喚我不知有甚事。卽今春天。好是困人時節也呵。〔旦唱〕

〔南呂一枝花〕青歸柳眼舒。紅入桃腮嫩。紫含櫻口小。綠遍草芽新。春色三分。心寄在荳蔻梢頭恨。夢迷了梨花月底魂。好教我盼佳期立蒼苔。濕透金蓮。憶芳信。卜易卦銅腥玉筍。

〔梁州第七〕呆答孩臨寶鑑。慵施粉黛。因朦騰墜鶯釵。懶整烏雲。這些時

瘦身軀寬掩過衫兒。綃銀箏不按。錦瑟濛塵。紫簫棄置。象板沈淪。秦樓中闌珊了。翠袖紅裙。章臺上空閑了。玉笋金樽。捱不徹苦厭厭。兩處相思。斷送了瘦怯怯。一身病損。只消得冷清清。幾箇黃昏。只因母親忒眼。掌着那斗來大一顆花門印。判子弟不公論。直待錢龍活現身。纔得他喜色津津。

〔隔尾〕捱了些短檠燭滅更初盡。古鼎香殘火尙溫。想着那被冷人孤那時分。聽數聲譙樓上鼓頻。搵幾點香腮上淚痕。便叫徹鄰雞也睡不穩。〔旦與卜相見了〕〔卜云云了〕〔旦唱〕

〔牧羊關〕既將人鸞鳳成孤另。鴛鴦兩下分。又怎生配與那鴉鵲同羣。〔卜

云〕甚鴉鵲鸞鳳鴛鴦。他都是箇人。我只說有錢的便是好的。〔旦唱〕妳妳呵你怎生一世兒人義皆無。半生來錢財忒緊。只貪圖人利物。全不顧自家門。

枉教你乾棗兒心希望。休想我葫蘆提隨衆滾。〔淨貼淨上相見了〕

〔貼淨云〕陸客官一心待與妳做女婿。怎生做箇主張。着大姐留了罷。今又添五十兩銀。共是一百兩銀。也是快使錢的子弟了。妳說一說。大姐依了罷。  
〔旦云〕休道一百兩。便一萬兩我也不肯。〔淨云〕小生也來大姐家走了好兩次了。只想着舊日相識之意。也當依從了罷。〔旦唱〕

〔賀新郎〕說與你泛桃花。休想覓芳春。怎做的舊日劉郎。又來訪問。〔貼

淨云〕大姐可憐見。留下陸客官。養活小子些。〔旦唱〕一任你蜂狂蝶亂。相

隨趁。便休想團香團香。弄粉。枉擔閣你暮雨朝雲。我已自半年來無點淚。再怎肯兩遍家結婚姻。我說來的言語無私徇。〔淨云〕周生已自不來了。與

你義斷恩絕也。還又說他怎地。〔旦唱〕我與他海枯恩未盡。石爛義常存。

〔卜云〕女兒如今這陸客官十分標致。將的錢物不少。務必你留了罷。〔旦云〕

女兒一世不肯又留他。已自與周生爲妻了。怎肯又與他相伴。〔淨云〕大姐守志不從罷。小子二人告回。〔卜云〕客官且慢去。不信到由不得老身。〔卜扯住

淨〔卜云〕且喫會酒再商量。〔旦唱〕

〔玄鶴鳴〕你看他打子弟鼗鼓棍。纏郎君濕布裙。待把咱強裝入愁布袋。生攪在麪糊盆。妳妳呵。你試將手抵着牙兒。牙兒自忖。我怎肯又向那柳戶花街。爲蹂粧狂。風亭月館。殢雨尤雲。被那等謊敲才。每檢尸般檢尸般凌虐人。我其實怕逢這腌運。羞戴那屎盆。

〔烏夜啼〕想烟花業債心常恨。莫不是常逢着寡宿孤辰。料生前熬不出這腌膾運。幾時得脫離風塵。改換家門。〔卜云〕改換家門。你待要做良人。怎

脫的這烟花名字。你不從我說。我將你嫁了。也討得些錢使。〔旦唱〕你休要

絮叨叨只顧里苦相噴。我這里氣撲撲消不盡閑愁悶。〔卜云〕你不留這

客人。休在我家住。〔旦唱〕逼得人無投奔。〔卜大鬧云云了〕〔旦云〕妳妳

這等逼我接客呵。不如死了罷。〔卜云〕你不想我子母深恩。〔旦唱〕我則待守

一世。夫妻正理。娘呵。顧不得你。子母深恩。〔卜又大鬧云云了〕〔旦云〕我爲守

志便死何妨〔卜云〕你乾死了。休將死字兒來誑我。我不信。務要你留這客人。

〔旦唱〕

〔黃鍾尾聲〕罷罷罷向人間拚捨了情郎分。到身後標題箇烈女魂。我實是立心貞。出言准。守清名。志堅穩。不由我氣長吁。淚偷搵。濕香腮。淡脂粉。顰烏雲。玉釵損。禁不得薄嬖嗔。受不得子弟窘。因此上一世兒盡節向一箇郎君。不强似做那等雜不刺的衆人妻到折了本。〔下〕

〔卜云〕這妮子走入後房去。怕不眞箇尋死去了。〔卜虛下就上叫云〕都來救一救。臘兒自縊死了。〔貼淨正淨趨搶科〕〔淨云〕都是你引我來他家惹下大事。〔貼淨云〕誰教你要尋箇女兒梳攏來。〔相爭相打一折了卜〕〔外排劉

鳴高上云〕小人便是劉鳴高。昨日不想我女兒盼春。不肯留客人。他娘說了他幾句。就去自縊了。有這等不養家的妮子。你爲戀着一箇漢子。不肯接客尋死了。不打緊。被這一院裏人笑話壞我家。養這等不爭氣的女子。如今買了箇

棺材殮了他。衆親戚隣里都送出城去。火焚了罷。衆人都來了。只有院門前白婆婆不會到。此人有些正性。我等他來送時。路上問他。我女兒死的是也不是。  
〔下〕〔旦改辦上云〕老身是這院門前住的白婆婆。今有樂工劉鳴高家女兒。爲那周恭守志。不肯接客。自縊死了。老身想來。娼妓之中。難得此女子也。〔旦唱〕

〔雙調新水令〕想不到污泥中長出並頭蓮。題起這義娼名世人罕見。兩雲鄉生烈女。風月所寄佳編。千古名傳。但說著這孩兒本堪羨。〔外辦劉鳴高同卜上〕〔外云〕今日送我女兒出城去。衆親戚一同送殯行動些。〔旦云〕來到這街上。兀的送殯的是劉鳴高家。我也送他出城走一遭。這送殯的院裏人。可憐無一箇說這孩兒死的是的。那虔婆每爲那兩貫錢鈔。將這正勾當都看的輕易了呵。〔旦唱〕

〔喬牌兒〕這孩兒守清名實可憐。則被那虔婆每忒錯見。都則待迎新送



舊成家眷。則將這合歡花零碎剪。〔外上做與旦相見了〕〔哭了〕〔卜云〕老身不曾積德。養下這箇五逆的妮子。如今去了老身死去了。〔外云〕如今我女兒死了。這院裏老的小的。都笑話我家養了這等不覓錢戀漢子的妮子。白婆。婆你從來正直。你說我這女兒死的如何。〔旦云〕你每這院裏人。只知道迎新送舊。留人接客。是你每衣飯。那三綱五常的大道理。如何得知。你女兒既將一箇身子伴了箇男子漢。他不肯又與別人相伴。正是他有羞恥。有志氣。生成知道三綱五常之人。與你院中其他妓女不同。怎生說他死的不是。久後你這一家。因你這女兒出了箇好名兒哩。我試說與你一遍聽咱。〔旦唱〕

〔鴈兒落〕他已自同諧並宿鴛。又怎肯再結于飛燕。既成了鸞鳳交。不引惹蜂蝶怨。

〔得勝令〕他雖是薄命喪黃泉。他已自烈性上青天。玉骨雖埋土。香魂半是仙。他死的名全。將您這巴鐔的虔婆勸。一世兒貞堅。難同那淫奔的浪。

婦言〔外云〕原來我女兒死的是也。俺這等人家。怎知道正勾當。白婆婆。你說我女兒死的比謝桂英如何。〔旦云〕桂英有甚打緊。不在話下。你聽我說。〔旦唱〕

〔甜水令〕說起那謝氏當年。先爲迎送。多曾經變。偏怎生到王魁。纔肯把心專。便做是二十爲娼。三十自盡。也曾有十年姻眷。〔旦云〕桂英死有甚希罕。〔旦唱〕他多管爲五花封訴屈聲冤。

〔折桂令〕爭如這劉盼春。節義雙全。他拚了箇十八歲嬌容。做了那五百載因緣。恰便似糞壤上靈芝。鴉窠中彩鳳。濁水內紅鴛。怕不他今世裏緣薄分淺。乞求得再生來美滿團圓。標題在月戶雲軒。聲名滿汴水梁園。出色與錦陣花營。流芳入黃卷青編。〔末上云〕小生是周恭。昨日聽得院裏劉大姐盼春。爲我的情意不肯接人。自縊身死。小生聞知。痛傷懷抱。如今將着香紙。送他出殯。到於城外。也是小生伉儷之情。前面走的是白婆婆。我趕上與他相見咱。〔做與旦相見了〕〔旦云〕周恭難得你這渾家。雖是樂人。這等守志。你

却休忘了他恩義也。〔末云〕小生永不肯忘大姐深恩。小生發了誓願。終身不娶妻室了。〔旦唱〕

〔沽美酒〕死別離真可憐。生痛切豈堪言。你待要從今後不覓鸞膠續斷絃。設神前呪願。相思海苦無邊。

〔太平令〕風霎霎一天哀怨。雲匝匝滿腹熬煎。愁黯黯啼痕如霰。昏慘慘塵埃滿面。〔旦推門未靠後〕〔旦唱〕你且靠那邊。略遠少要近前。〔末云〕怎生不要我近前。〔旦唱〕我則怕引的他鬼魂兒又來活現。〔外云〕來到這城外也。俺澆奠女兒一盞酒。着周生祭了。燒了紙了。發火焚化也。〔末做祭了〕〔做焚化科〕〔旦唱〕

〔川撥棹〕猛見他靄濃烟。看花棺風力捲。我則見紅焰遮天。悴粉憔胭。滿地銀錢。化作金蓮。又見箇旋風兒足律律的在前。敢是他陰靈兒又相牽。

〔七弟兄〕好教人向天淚漣。烈火內葬嬋娟。撚指間冰肌銷化難留戀。粉香殘滅了舊花鈿。灰燼中那得芙蓉面。〔卜外向前〕〔卜云〕我拾了他這骨殖。放入小材兒內。將去墳上葬埋也。〔卜做哭着拾骨殖科〕〔外云〕婆婆你看。好是奇怪也。怎生女兒帶的這箇荷包香囊兒。不曾燒化了。依舊好好地在灰燼之中試取出看。〔旦云〕您衆親戚靠前看。是好蹺奇也。〔旦唱〕

〔梅花酒〕怎生這香囊兒尙不燃。越燃得顏色新鮮。絨線依然。〔旦云〕老劉快疾取出看一看。〔旦唱〕真得俄延。細看根源。綵繩兒還繫着攜口兒尙周全。莫是他自化顯。自化顯。正芳年。正芳年。想前緣。想前緣。意留連。意留連。憶盟言。憶盟言。兩情專。兩情專。一心堅。一心堅。苦相牽。苦相牽。鬼魂纏。鬼魂纏。口難宣。口難宣。着誰傳。

〔收江南〕因此上人坑中留下箇永團圓。他將這香囊兒權表舊因緣。〔氣驚叫科〕〔旦唱〕不索您天驚地怪鬧喧闐。將來到面前。看他那中

藏深恨有何冤。〔外開香囊取出簡書一紙〕〔外云〕小人不識字。不知這紙上寫箇甚言語。俺親眷中有識字的。念與俺衆人聽。〔親眷二人念云〕情人周子敬。拜上心友人劉氏盼春大姐粧前。睽遠恩愛。又越歲華。一自別來。思念愈切。雖相去於咫尺之間。如阻隔於千里之外。魚沈鴈杳。有信難通。鳳隻鸞孤。無緣可會。念吾之風流雲散。畏嚴訓於椿堂。思爾之月約星期。被防閑於萱室。玉欄縵斷。墜井底之銀瓶。錦袋塵濛。暗粧前之寶鑑。空餘半幅寒衾。彷彿似蝴蝶夢中家萬里。愁聽數聲殘角。淒涼如子規枝上月三更。獨對青燈。閑居白屋。念情人於舞裙邊歌扇底。無復望舊日因緣。盼佳期於茶房前酒館內。豈重續當時繾綣。春花秋月。朝朝美景亦成空。暮鼓晨鐘。夜夜芳心都擊碎。雖不曾依依楊柳門前繫馬。有誰家常則是泛泛桃花。洞裏尋春無我輩。縱遠鶯朋燕友。難禁蝶使蜂媒。既居於月戶雲窗。莫吝於雨期雲會。花胡洞不可久孤眠。錦排場豈能常獨坐。休把樽空雲子酒。莫教衆怨雪兒歌。多囑情人。深知心友。願順乎薄嬾。

香齋集 一四  
之情。以從夫狴狴之計。風塵院宇。權爲送舊迎新。花月樓臺。且作隨機應變。旣爲了周家姬。劉家女。念伊本自心堅。便作箇張郎婦。李郎妻。知爾實非情愿。暫時依彼。將就瓦全。終日違他。恐防玉碎。倘能見聽。事切於衷。願勿懷疑。言止於此。所綴小詞一篇。調寄長相思之令。謹錄于左。秋氣漸涼。順時自愛。不具備。

詞云。憶佳期。盼佳期。欲寄鸞箋。鴈字稀。新詞和淚題。怕分離。又分離。無限

相思訴與誰。此情風月知。〔念畢〕〔外云〕原來是周生與他的書簡。〔末哭了

跪下云〕不想大姐這等誠心。收着小生書簡。告的岳父岳母知道。怎生可憐

見。大姐在生時不曾得些鬆寬。與小生相守。如今旣亡過了。這一堆灰襯骨殖。

也無用了。怎生可憐見。乞與小生墳內埋葬。小生永不再婚。情愿終身與岳父

爲壻。〔外云〕這事也容易。只是一件。不曾稟的色長知道。怎敢擅自與你將去。

〔卜云〕不與。不與。我的箇女兒。被你狐媚的他想你死去了。我不問你要燒埋

錢還好哩。你又來討我女兒骨殖。你待要時。一兩骨殖將一兩金子來纔與你。

〔末云〕使妳妳埋葬了。也與小生理葬一般。左右入土去了。也無用了。〔卜云〕怎地無用。搗碎了賣與漆匠做灰布。也漆的兩箇淨桶。〔打住〕〔旦云〕劉大哥這是一件貞烈好事。感天動地。夫妻情愛。水火不能消化。你聽我說。〔旦唱〕

〔水仙子〕他正是海枯石爛意猶全。骨化形銷志尙堅。灰飛煙滅情還見。可憐他訴衷腸詞一篇。則您兩口兒聽妾良言。做人呵雖不得同歡會。做鬼呵也教他相顧戀。放從良與他箇骨殖上團圓。〔外云〕白婆婆也說得是。如今色長也送殯在此。兀那樹陰下坐哩。我請來看了這香囊詞簡。若色長主張。將女兒骨殖與你去時。你便將去。〔卜云〕我女兒活時不肯與俺覓錢。便死後也索覓兩貫錢時。你將十兩銀來。等你丈人丈母死了時。將骨殖一發都與你去。〔外云〕老骨殖要做何用。〔打住〕〔色長上云云了〕〔末跪告云〕小子情愿出十兩銀。贖大姐這骨殖去葬去。〔色長判斷念云〕

若說古今人品。

義夫節婦真稀。

劉家有女二八。

配與周子爲妻。

兩情如魚似水。

半年共寢同偎。

豈料尊堂嚴訓。

忽然阻隔佳期。

尺鯉賓鴻斷信。

孤鸞寡鳳分飛。

劉氏貞堅守志。

終身不被人欺。

周子誤盟不娶。

甘心獨宿孤幃。

只爲家貧受窘。

常教親母禁持。

一朝盡節自縊。

可憐死別生離。

周子聞喪送殯。

傷情痛哭悽悽。

城外火焚屍櫬。

銷鎔玉骨冰肌。

惟有香囊尙在。

火中半縷無虧。

堪嘆兩情堅固。

此心終不成灰。



子敬感恩思怨。

欲求骸骨相隨。

葬入周郎墳墓。

百年死後同依。

生前不曾得箇從良文字。

死後合與他骨殖同歸。

這因緣非同小可。

夫婦道千載光輝。

〔色長云〕將盼春骨殖付與周恭去者。〔末抱骨殖謝了〕〔旦唱〕

〔鴛鴦尾聲〕一生節義人稀見。兩家眷愛都堪羨。百載因緣。半世心堅。唱道這段恩情。風流不淺。天若留情。共天也。成哀怨。好名兒千古留傳。立節向花街將姓名顯。

題目

風流子生前言誓願

貞烈女死後成姻眷

周子敬題情錦字箋

正名

劉盼春守志香囊怨

新編劉盼春守志香囊怨